

摘藻堂四庫全書薈要

史部

欽定四庫全書薈要

史部

御批通鑑綱目卷十五

詳校官編修臣汪鏞



欽定四庫全書薈要卷七千三百二十六

史部

御批資治通鑑綱目卷十五

起戊申漢後主建興六年。○考異 據凡例後主二凡
盡壬申漢後主延熙十五年 字皆當作帝禪

十五年



魏太和二年春正月魏陷新城孟達死之質實

吳黃武七年

新城郡名注見獻

帝建安二十五年

書法

孟達嘗書降魏矣既而書來歸美反正也於是持書死之其為從義之勸深矣

發明

孟達前叛降魏既而又復來歸是迷而能反者也城陷而殞遂以死節予之惟漢有討賊

之義魏為篡弑之國是以從違之間書法如此

○丞相亮伐魏戰于街亭敗績詔貶亮右將軍行丞相

事

初魏以夏侯淵子楙都督關中至是丞相亮將伐魏與群下謀之司馬懿延曰楙主婿也怯而無謀今假延精兵五千負糧五千直從褒中出循秦嶺而東當子午而北不過十日可到長安楙聞延奄至必棄城走橫門邸閣與散民之穀足周食也比東方合聚尚二十許日而公從斜谷來亦足以達如此則一舉而咸陽以西可定矣亮以此為危計不如安從坦道可以平取隴右十全必克而無虞故不用延計揚聲由斜谷取郿使將軍趙雲鄧芝為疑軍據箕谷魏使曹真督諸軍軍郿以拒之亮乃率大軍攻祁山戎陳整

齊號令明肅始魏以昭烈既崩數歲寂然無聞是以
畧無備豫而卒聞亮出朝野恐懼於是天水南安安
定皆舉軍應亮關中響震魏主叡如長安右將軍張
郃率步騎五萬拒之亮使叅軍馬謖督諸軍與郃戰
于街亭謖違亮節度舉措煩擾舍水上山不下據城
郃絕其汲道擊大破之亮乃拔西縣千餘家還漢中
初亮以謖才術過人深加器異昭烈臨終謂曰謖言
過其實不可大用君其察之亮未以為然引謖叅軍
事每與談論自晝達夜至是乃收殺之而自臨祭為
之流涕撫其遺孤恩若平生蔣琬謂亮曰昔楚殺得
臣而文公喜今天下未定而戮智計之士豈不惜乎
亮流涕曰孫武所以能制勝於天下者用法明也今
四海分裂兵交方始若復廢法何用討賊邪先是裨
將軍王平連規諫謖謖不能用及敗衆散惟平所領
千餘人鳴鼓自守張郃疑其有伏不敢逼於是平徐
徐收合諸營散兵以還亮拜平叅軍進位封侯上疏

請自貶三等詔以右將軍行丞相事時趙雲亦以箕
谷兵敗坐貶亮問鄧芝曰箕谷軍退兵將初不相失
何也芝曰趙雲身自斷後軍資什物畧無所棄不但
兵將不相失也雲有軍資餘絹亮使分賜將士雲曰
軍事無利何為有賜請湏十月為冬給亮大善之或
勸亮更發兵者亮曰大軍在祁山箕谷皆多於賊而
不破賊乃為賊所破此病不在兵少也在一人耳今
欲減兵省將明罰思過校變通之道於將來若不能
然者雖兵多何益自今已後諸有忠慮於國但勤攻
吾之闕則事可定賊可死功可躋足而待矣於是考
微勞甄壯烈引咎責躬布所失於天下厲兵講武以
為後圖戎士簡練民忘其敗矣亮之出祁山也天水
叅軍姜維詣亮降亮美其膽智使典軍事魏曹真復
取三郡以亮懲祁山必出陳倉使將軍郝昭城守以
備之

集覽

斜秦嶺在號州閬鄉縣南周回三百里注見
斜秦嶺在號州閬鄉縣南周回三百里注見

下子午子午辛氏三秦記長安正南山名秦嶺谷名
子午一名樊川一名御宿子北方午南方也言通南
北道相當故名子午谷按洋州志子午谷在州東百
六十里又興元郡縣志云舊子午道在金州安康界
梁將軍王神念以緣山避水橋梁百數多有毀壞乃
別開乾路更名子午道即此路是橫門邨閣如淳曰
橫音光三輔黃圖云長安城北面門名也邨閣倉敖
異名在橫門外斜谷注見成帝元延三年褒斜邨注
見靈帝中平六年箕谷在興元府褒城西北十五里
韋蘇州懷谷口詩念昔白衣士結廬在石門蓋石門
即箕谷口成帝時鄭子真隱居處也或謂扶風郿縣
郿塢即箕谷也祁山在岷州長道縣南十里開山圖
云漢陽西南祁山乃九州之名阻天下之奇峻諸葛
亮攻祁山即此按岷州今西和州是南安漢屬廣漢
郡為葭萌地先主改漢壽縣唐析綿谷置三泉縣於
縣西南安州今大安軍是街亭徐廣曰天水郡隴西

縣有街泉亭所謂秦亭是也按方輿勝覽興元府有街亭注魏張郃與蜀馬謖戰于此西縣注見靈帝建寧二年楚殺得臣而文公喜得臣姓成字子玉春秋楚令尹也先是晉楚戰于城濮楚師敗績晉文公有憂色左右曰有喜而憂何也公曰得臣猶在憂未歇也及楚殺得臣晉侯聞之而後喜可知也曰莫余毒也已孫武注見唐玄宗開元二十四年斷後軍居後曰斷後亦曰殿師杜預曰斷後兵家之最難我兵既敗敵人來追我在後拒之非有勇者不能也斷音短殿丁練反什物史記舜作什器索隱曰什數也人家常用之器不一故以什為數猶今言什物顏師古曰軍法五人為伍二伍為什則共器物故謂之什器亦猶作役者十人為質實一統志云秦嶺在西安府藍田縣界子午谷名在西安府火共畜為度也

城南一百里谷中路連南北故名鄧芝新野人箕谷即箕山在漢中府褒城縣北一十五里一名道人谷

曹真沛國譙人操族子祁山在鞏昌府西和縣北七里山上有城極嚴固天水郡名注見光武建武元年南安古地名即春秋戎羌所居秦屬隴西郡東漢末分立南安郡三國魏隴西郡治襄武南安郡治獮道晉仍舊後魏為隴西南安陽三郡兼置渭州後周併為南安郡隋廢後復置隴西郡唐置渭州天寶初改隴西郡寶應後陷于吐蕃宋皇祐中以渭州地置古渭寨熙寧中改通遠軍崇寧中改鞏州金始為鞏昌府元初改為鞏昌路國朝改為鞏昌府屬陝西道安定郡名注見光武建武元年馬謖襄陽宜城人良之弟王平巴西宕渠人陳倉縣名注見安帝元初四年

書法

書伐魏尊漢也街亭之敗馬謖為之書敗績矣復書貶亮其不為賢者諱何亮自貶也書

曰詔貶適所以昭平明之治何諱焉故自是止書右將軍亮

發明

街亭之敗違命者馬謖耳而以丞相亮書之者權歸主將也貶官三等自請者孔明耳而

以詔貶亮書之者命出于上也惟孔明身任討伐之責事幼主而無貳心是以所書如此綱目亦豈

私於孔明者哉

夏四月魏以徐邈為涼州刺史質實

徐邈
薊人

邈務農積穀立學明訓進善黜惡與羌胡從事不問小過若犯大罪先告部帥乃斬以徇由是服其威信

州界
肅清

五月大旱○吳人誘魏揚州牧曹休戰于石亭大敗之

吳使鄱陽太守周魴詐以郡降於魏魏揚州牧曹休率步騎十萬向皖以應之魏主叡又使司馬懿向江

陵賈逵向東關三道俱進八月吳主權至皖以陸遜
為大都督假黃鉞親執鞭以見之以朱桓全琮為左
右督各督三萬人以擊休桓曰休以親見任非智勇
名將今戰必敗敗必走走當由夾石挂車此兩道險
阨若以萬兵柴路則彼眾可盡而休可虜臣請將所
部以斷之若得休則可乘勝長驅進取壽春以規許
洛此萬世一時也權以問陸遜遜以為不可乃止戰
于石亭遜令桓琮為左右翼三道俱進衝休伏兵因
驅走之追至夾石斬獲萬餘資仗畧盡初叡命賈逵
引兵東與休合逵曰賊無東關之備必并軍於皖而
休深入與戰必敗乃亟進聞休已敗而吳遣兵斷夾
石諸將或欲待後軍逵曰休兵敗路絕進退不能安
危之機不及終日今疾進出賊不意此所謂先人以
奪其心也若待後軍賊已斷險兵多何益乃兼道進
軍而多設旗鼓疑兵吳人驚退休乃得還初集覽東
逵與休不善至是賴逵以免魏亦不之罪也

縣名屬梓潼郡按梓潼今潼川府是假黃鉞鉞大斧也飾之以金故曰黃鉞大都督本無黃鉞假與之所以重其威夾石夾本作硤今安慶府桐城北四十里南硤戎是按吳志呂蒙伐皖魏張遼救之至硤石聞城已拔乃就硤石築南硤戎即此挂車挂與掛通車昌遮反桐城西四十里有挂車鎮鎮有挂車嶺柴路柴讀曰砦與寨同先人以奪其心先悉薦反左傳宣十二年詩云元戎十乘以先啓行先人也軍志曰先人有奪人之心注先人為

正誤

東關今按巢縣有東西二關吳魏相持於

此濡湏山謂之東關又見集覽本卷末三國時梓潼屬蜀非吳地也柴路今按柴去聲塞斷也**質實**

周魴陽羨人曹休沛國譙人操之族子皖縣名注見獻帝建安四年朱桓吳縣人全琮錢塘人一統志云挂車嶺在安慶府城西南四十五里東關在廬州府巢縣東南四十里天下有事乃必爭之地吳魏嘗相

持於此

書法

漢書遣間誘匈奴罪誘之者也此書誘戰何罪敗者也兩軍相向而為所誘以至敗績不

可以言智矣綱目書誘戰四詳武帝元光二年而書敗滅者三皆罪敗者也

冬十二月右將軍亮伐魏圍陳倉不克而還斬其追將

王雙

右將軍亮聞曹休敗魏兵東下關中虛弱欲出兵擊魏群臣多以為疑亮言於帝曰先帝以漢賊不兩立王業不偏安故託臣以討賊以先帝之明量臣之才固知臣才弱敵彊然不伐賊王業亦亡惟坐而待亡孰與伐之是故託臣而弗疑也臣受命之日寢不安席食不甘味思惟北征宜先入南故五月渡瀘深入

不毛臣非不自惜也顧王業不可偏全於蜀都故冒
危難以奉先帝之遺意也而議者謂為非計今賊適
疲於西又務於東兵法乘勞此進趨之時也且高帝
明並日月謀臣淵深然涉險被創危然後安今陛下
未及高帝謀臣不如良平而欲以長計取勝坐定天
下此臣之未解一也劉繇王朗各據州郡論安言計
動引聖人羣疑滿腹衆難塞胸今歲不戰明年不征
使孫策坐大遂并江東此臣之未解二也臣到漢中
中間期年已喪趙雲等及曲長屯將七十餘人突將
武騎一千餘人皆數十年所糾合四方之精銳非一
州之所有若復數年則損三分之二當何以圖敵此
臣之未解三也今民窮兵疲而事不可息事不可息
則住與行勞費正等而不及虛圖之欲以一州之地
與賊支久此臣之未解四也夫難平者事也昔先帝
兵敗於楚曹操拊手謂天下已定矣然先帝東連吳
越西取巴蜀舉兵北征夏侯授首此操之失計而漢

事將成也其後吳更違盟關羽毀敗秭歸蹉跌曹丕稱帝凡事如是難可逆見臣鞠躬盡力死而後已至於成敗利鈍非臣之明所能逆覩也十二月引兵數萬出散關圍陳倉不克使人說郝昭不下昭兵纔千餘人亮進攻之起雲梯衝車臨城昭以火箭逆射其梯人皆燒死昭又以繩連石磨壓其衝車衝車折亮乃更為井闌百尺以射城中以土丸填塹欲直攀城昭又於內築重牆亮又為地突欲踊出於城裏昭又於城內穿地橫截之晝夜相攻拒二十餘日魏遣張郃救之未至亮糧盡引還將軍王雙追亮亮擊斬之

集覽

曲長凡大將軍營五部部有校尉一人部下有曲曲有軍候一人夏侯授首獻帝末魏夏侯淵

與蜀黃忠戰於定軍山淵軍敗被殺秭歸蹉跌章質

武二年自秭歸擊吳為吳所敗逆見猶言豫料

實

秭歸縣名注見和帝永元十二年散關注見唐僖宗光啓三年

魏以公孫淵為遼東太守質實

遼東郡名注見
秦王政三年

初公孫康卒子淵幼弟恭立及淵長脇奪恭位上書言狀侍中劉曄曰公孫氏世權日久今若不誅後必生患不如因其新立有黨有仇先其不意以兵臨之開設賞募可不勞師而定也魏主不從因有是命

吳大司馬呂範卒

初孫策使範典財計時吳王權年少私從有求範必關白不敢專許及權守陽羨長有所私用策或料覆功曹周谷輒為傳著簿書使無譴問權以是望範而悅谷及後統事以範忠誠信任之而谷能欺更簿書不用也至是以範為大司馬印綬未下而卒

集覽

陽羨即毘陵也秦屬會稽太康地記陽羨縣本

名荆溪吳越間謂荆為楚秦以子楚故改為陽羨于線反料覆料計覆考也傳著猶言虛椿史炤曰傳

符遇反著也著直畧反質實一統志云陽羨秦之縣附也望範謂怨望呂範名漢初屬會稽郡後屬

吳郡三國吳時屬吳興郡晉置義興郡隋廢郡改縣曰義興以義鄉國山臨津三縣省入屬常州唐初改

鵝州尋改南興州後仍為義興縣屬常州宋改宜興縣元陞為府尋罷為縣後復陞為州本朝復為縣改

屬常州府

書法

於是印綬未下書大司馬何子賢也苟賢也呂範雖印綬未下而卒書大司馬蔡興宗雖

未拜而卒書中書監皆綱目之持筆也

己酉七年

魏太和三年吳黃龍元年

春右將軍亮伐魏拔武都陰平復

拜丞相質實

武都郡名注見獻帝建安二十四年陰平縣名注見獻帝初平四年

夏四

月吳王孫權稱皇帝

吳王權即皇帝位大赦改元百官畢會權歸功於周瑜將軍張昭舉笏欲褒贊功德未及言權曰如張公計今已乞食矣昭大慙汗權追尊父堅為武烈皇帝兄策為長沙桓王立子登為太子以諸葛恪為太子左輔張休為右弼顧譚為輔正陳表為翼正謝景范慎羊衢等為賓客於是東宮號多士太子使侍中胡綜作賓友目曰英才卓越則諸葛恪精識時機則顧譚凝辯宏達則謝景究學甄微則范慎羊衢私駁之曰元遜才而疏子嘿精而狠叔發辨而浮孝敬深而隱恪等惡之其後皆敗如衢所言

集覽

如張

公計今已乞食矣先曹操伐吳張昭勸權迎操唯周瑜魯肅請拒之今權故云羊衢衢古文道字甄微甄察其微妙之指元遜諸葛恪字子嘿

質實

一統志云顧譚字叔發謝景字孝敬范慎字

人邵之子范慎廣
陵人胡綜固始人

遣衛尉陳震使吳及吳主權盟

吳主權使以並尊二帝來告衆皆以為交之無益而名體弗順宜顯明正義絕其盟好丞相亮曰權有僭逆之心久矣國家所以畧其讐情者求犄角之援也今若加顯絕讐我必深更當移兵東戍與之角力須併其土乃議中原彼賢才尚多將相輯睦未可一朝定也頃兵相守坐而須老使北賊得計非算之上者昔孝文卑辭匈奴先帝優與吳盟皆應權通變深思遠益非若匹夫之忿者也議者以權利在鼎足不能并力且志望已滿無上岸之情此皆似是而非也蓋其智力不侔故限江自保權之不能越江猶魏賊之不能渡漢非力有餘而利不取也若大軍致討彼上當分裂其地以為後圖下當畧民廣境示武於內非

端坐者也。就其不動而睦於我，我之北伐無東顧憂。河南之衆不得盡西，此之為利亦已深矣。權僭逆之罪未宜明也。乃遣震賀。集覽：無上岸之情，謂吳無擊吳權與盟約中分天下。魏之意也。獻帝時孫權作濡須塢，諸將皆曰：「上岸擊賊，質實。」陳震南陽人，孝洗足入船，何用塢為？今亮故云。質實：陳震南陽人，孝在文帝六年，先帝優與吳盟事。在昭烈帝章武二年。

吳以張昭為輔吳將軍

吳主權嘗於武昌臨釣臺飲酒，大醉，使人以水灑羣臣。曰：「今日醉墮臺中，乃止。」昭正色而出。權呼入，謂曰：「共作樂耳，公何為怒乎？」昭曰：「昔紂糟丘酒池，長夜之飲，當時亦以為樂，不以為惡也。權默然遂罷酒。至是，昭以病告老，更拜輔吳將軍。班、亞、三司昭每朝見，辭色壯厲，義形於色。會以直言逆旨，中不進見。後漢使

來稱漢德美羣臣莫能屈權復思昭遣中使勞問請
見昭避席謝權跪止之昭坐定仰曰昔太后桓王不
以老臣屬陛下而以陛下屬老臣是以思盡臣節以
報厚恩而意慮淺短違逆盛旨然臣愚心所以事國
志在忠益畢命而已若乃變心易慮以

集覽

武昌今
鄂州是

故楚之東鄂也漢置江夏郡領鄂縣獻帝時黃祖為
江夏守始於沙羨置屯孫權破黃祖於沙羨遂改武
昌釣臺在今壽昌軍北門外大江中紂糟丘酒池殷
本紀紂大最樂戲於沙丘以酒為池注太公六韜曰
紂為酒池回盤糟丘而牛飲者三千餘人為輦括地
志云酒池在衛州衛縣西二十三里中不進見中間
因逆旨故不
質實

一統志云武昌即古之鄂邑春秋
時楚封鄂王於此又謂之夏汭秦

魯敢進見

屬南郡漢置江夏郡治沙羨三國時吳分江夏更置
武昌郡治武昌縣徙都焉晉以武昌隸江州江夏隸

荊州劉宋於江夏縣置江夏郡兼置郢州梁分置北
新州隋平陳改置鄂州大業初為江夏郡唐復為鄂
州天寶初改江夏郡乾元初復為鄂州屬江南道元
和初陞武昌軍節度五代時唐遙改武清軍南唐復
為武昌軍宋以鄂州屬荆湖北路元至元中置鄂州
路大德中改為武昌路本朝改為武昌府屬湖廣道
釣臺在武昌府武昌縣北門外大江中吳主權嘗駐
兵于此糟丘酒池在大名府濬縣西七十二里朝歌
城南

秋七月魏制後嗣有由諸侯入奉大統者不得顧私親

詔曰禮王后無嗣擇建支子以繼大宗則當纂正統
而奉公義何得復顧私親哉其令公卿有司深以前
世行事為戒後嗣萬一有由諸侯入奉大統則當明
為人後之義敢為導諛建非正之號以干正統謂考

為皇稱妣為后則股肱大臣誅之無**集覽**支子支謂
赦其書之金策藏之宗廟著于令典庶孽之多
如木之有枝

九月吳遷都建業使上大將軍陸遜輔太子登守武昌

吳主權遷都建業皆因故府不復增改使上大將軍
陸遜輔太子登及尚書九官留武昌南陽劉廙嘗著
先刑後禮論同郡謝景稱之於遜遜呵景曰禮之長
於刑久矣廙以細辯而詭先聖之教君侍東宮宜遵
仁義以彰德音若彼之談不須講也太子與西陵都
督步騭書求見啓誨騭條時事在荊州界者及諸僚
吏行能以報之且上疏曰人君不親小事使百官有
司各任其職故舜命九賢則無所用心不下廟堂而
天下治賢人所在折衝萬里信國家之利器
崇替之所由也願重以經意則天下幸甚

集覽建業

楚威王置金陵邑以地有王氣埋金鎮之秦改秣陵
吳改建業晉改丹陽唐置江寧府改昇州宋改建康
府長於刑長展兩反言當以禮為先也舜命九賢禹
平水土棄種百穀契敷五教皋陶明五刑垂共工益
作虞伯夷典禮夔典樂龍納言折衝萬里詩綿篇予
曰有禦侮注武臣折衝曰禦侮文中子王道篇折衝
樽俎可矣何必臨邊也注謂折兵衝也戰國策蘇秦
曰百尺之衝折之衽席之上信國家之利器信誠然
也老子微明章國之利器不可以示人又淳風章人
多利器國家滋昏林希逸云利器威權也人世便利
之用民多威權則上質實建業郡名注見獻帝興平
下不親國家昏亂質實二年秣陵南陽郡名注見
秦二世三年劉興安衆人西陵縣名
注見周赧王三十六年步騭淮陰人

冬十月魏立聽訟觀置律博士

魏主叡常言獄者天下之命因改平望觀為聽訟觀
每斷大獄詣觀臨聽之初魏文侯師李悝著法經六
篇蕭何定漢律益為九篇後稍增至六十篇又有令
三百餘篇決事比九百六卷馬鄭諸儒章句又十餘
家至是所當用二萬六千餘條七百七十餘萬言乃
詔但用鄭氏章句尚書衛顗奏刑法者國家之所貴
重而私議者之所輕賤獄吏者百姓之所縣命而選
用者之所卑下王政之敝未必不由此也請置律博
士從之又詔司空陳羣等刪約漢法制新律十八篇
州郡令四十五篇尚書官令軍中令百八十餘篇於
正律九篇為增於集覽悝枯回反決事比猶言斷例
旁章科令為省矣也比毗至反記王制比以成
之注已行故事質實陳群許人寔孫蕭何定漢律注
曰比疏云例也見高帝十二年馬鄭謂馬融鄭
玄注見宋文帝
元嘉二十七年

書法

書作蜚廉桂觀矣武帝元封二年又書起四百尺觀矣靈帝光和五年皆譏也此其書聽

訟觀何美之也魏主於是能慎罰矣綱目書觀七

魏聽訟是年秦聽訟晉孝武帝寧康三年宋總明

庚戌年周通道陳甲午年皆美也蜚廉桂觀四百

尺觀望僊觀唐文宗會昌二年皆譏也書律博士

始此終綱目書律博士

士二年隋癸卯年

十二月築漢樂二城

丞相亮徙府營於南山下築

集覽

沔陽本江夏竟陵

漢城於沔陽樂城於成固

縣諸葛亮築漢城

於此隋置沔州唐改復州今改沔陽府成固成或作

城今興元府城固縣諸葛亮築樂城於此括地志云

漢中城固縣故城

質實

一統志云沔陽漢之縣名屬

在今縣東六里

漢中郡曹魏梁州治沔陽西

晉末為氐楊茂搜所據劉宋取之後魏置東益州又分置岷冢縣西魏屬興州隋廢沔陽改岷冢曰西縣唐西縣屬梁州宋屬興元府元分西縣置鐸水縣而移沔州治鐸水併西縣入畧陽後又併鐸水入州屬廣元路至本朝改州為縣仍屬漢中府城固漢之縣名屬漢中郡有南北二城舊縣治北城三國蜀漢改樂城縣晉復為城固宋齊梁西魏皆因之隋屬梁州唐初改唐固後復為城固宋元俱仍舊本朝因之仍屬漢中府

庚戌八年

魏太和四年
吳黃龍二年

春吳發兵浮海求夷洲

吳主權使將軍衛溫諸葛直將甲士萬人浮海求夷洲
宣洲欲俘其民以益眾陸遜全琮皆諫以為桓王創基兵不一旅今江東見眾自足圖事不當遠涉不毛萬里襲人風波難測又民易水土必致疾疫且其

民異性情得之不足濟事無之不足虧衆權不聽溫等遂行經歲乃還士卒疾疫死者什八九亶洲絕遠不可至得夷洲數千人集覽桓王孫策也孫權稱尊以歸溫等以無功坐誅號追諡為長沙桓王襲人春秋傳例輕兵曰襲注掩其不備也

二月魏立郎吏課試法尚書諸葛誕等有罪免

魏尚書諸葛誕中書郎鄧颺等結為黨友更相題表以夏侯玄等為四聰誕輩為八達中書監劉放子熙中書令孫資子密吏部尚書衛臻子烈以父居執位容之為三豫行司徒事董昭上疏曰凡有天下者莫不貴樸忠之士疾虛偽之人以其毀教亂治敗俗傷化也竊見當今年少不復以學問為本專以交游為業國士不以孝悌清脩為首乃以趨執游利為先合黨連群互相褒歎以毀訾為罰戮用黨譽為爵賞附

已者則歎之盈言不附者則作為瑕釁至乃往來禁
與交通探問凡此諸事皆法之所不取刑之所不赦
也魏主叡善其言詔郎吏學通一經才任牧民博士
課試擢其高第者亟用其浮華不務道本者罷退之
仍免誕禁與隱奧之地
集覽也人所不見
正誤禁與今按謂禁省深嚴之地也
質

人

實

諸葛誕琅邪陽都人亮之兄夏侯玄沛國人尚之
子孫資太原人衛臻陳留襄邑人董昭濟陰定陶

秋七月魏寇漢中丞相亮出次成固九月魏師還

魏曹真以漢人數入請由斜谷伐之魏主叡詔司馬懿
懿沂漢水由西城與真會漢中諸將或欲由子午谷
或欲由武威陳群諫曰太祖昔攻張魯多收豆麥以
益軍糧魯未下而食猶乏今既無所因而斜谷阻險

轉運有鈔截之虞多留兵守要則損戰士不可不熟慮也并言軍事用度之計獻以羣議下真真據之遂行丞相亮聞之次於成固赤坂以待之召李嚴使將二萬人赴漢中會天大雨三十餘日棧道斷絕魏太尉華歆上疏曰陛下宜留心治道以征伐為後事為國者以民為基民以衣食為本使中國無饑寒之患百姓無離上之心則二敵之釁可坐而待也少府楊阜曰昔武王白魚入舟君臣變色動得吉瑞猶尚憂懼況有災異而不戰竦者哉今吳蜀未平而天屢降變諸軍始進便有天雨之患稽閱山險已積日矣轉負勞苦所費已多若有不繼必違本圖散騎常侍王肅曰前志有之千里饋糧士有饑色樵蘇後爨師不宿飽此謂平途之行軍者也又况深入險阻鑿路而前則其為勞必相百也今又加之以霖雨山坂峻滑衆迫而不展糧遠而難繼實行軍之大忌也聞曹真發已踰月而行裁半谷治道功夫戰士悉作是彼偏

得以逸待勞乃兵家之所憚也遠則周武出關而復還近則武文臨江而不濟豈非順天知時通於權變者哉乃集覽西城漢中西城縣漢末置西城郡魏文

詔班師

集覽

帝改魏興郡西魏改金州赤坂顏師古

曰漢中成固縣地寰宇記云在洋州東二十里曰龍

亭棧道注見周赧王三十六年白魚入舟注見成帝

永始元年魚鳥之瑞稽闕稽謂留止也闕與礙同前

志有之古者兵書有此語樵蘇後爨採薪曰樵取草

曰蘇言雖有糧必待樵蘇而後可炊爨師不宿飽謂

師衆無越宿而自飽之理周武出關復還武王東觀

兵至于盟津諸侯皆曰紂可伐王曰汝未知天命未

可也乃還師武文臨江不濟魏武帝進軍濡湏口與

吳相守月餘而還文帝質實一統志云西城漢之縣

以舟師擊吳臨江而還名屬漢中郡東漢末分

置西城郡曹魏改魏興郡梁改為東梁州西魏以其

地出金改名金州隋復為西城郡唐復為金州天寶

初改為安康郡乾元初改為金州宋改為昭化軍屬利州路元屬興元路本朝因之改屬漢中府漢水注見獻帝建安十二年武威郡名注見光武建武十年赤坂地名在漢中府洋縣東二十里其土色赭故名李嚴南陽人王肅東海郟人朗之子

書法

書魏以寇尊漢也

發明

綱目凡諸侯之於王室外蕃之於中國僭偽之於正統或加兵犯境則書曰寇非此類則

不書諸葛孔明左右昭烈為漢討賊聲大義於天下功雖不就名則正矣自陳壽志三國以魏為主通鑑因之紀年故於孔明伐魏之舉反以入寇書之則是以討賊之人名為賊耳綱目既以昭烈紹漢之統故於魏兵犯境書之為寇然後名正言順而正偽之辨始明固非好為立異也正前人之

未正卒歸之是亦所以更相發明云耳九
原可作切謂司馬公光必有取於斯言

魏主叡如許昌

魏主叡如許昌左僕射徐宣總留事及還主者
奏呈文書叡曰吾省與僕射省何異竟不視
質實

許昌縣名注見

建興十二年

冬十二月吳人攻魏合肥不克

魏征東將軍滿寵聞吳欲攻合肥表請召兵吳尋退
還寵以為賊大舉而還非其本意此必欲偽退以罷
吾兵而倒還乘虛掩不備也遂表不還
質實
罷兵後十餘日吳果來攻不克而還
滿寵昌邑人合肥縣

名注見靈帝

中平五年

丞相亮以蔣琬為長史質實

蔣琬長沙湘鄉人

亮數外出琬常足食足兵以相供給亮每言公琰託志忠雅當與吾共贊王業者也

集覽

公琰蔣琬

表字

吳廷尉監隱蕃作亂伏誅

青州人隱蕃逃奔入吳上書求見吳主權召入蕃陳時務甚有辭觀權以為廷尉監將軍朱據廷尉郝普皆稱其有王佐才於是蕃門車馬雲集潘濬子翦亦與周旋饋餉之濬聞大怒疏責翦曰吾受國厚恩志報以命爾等在都當念恭順親賢慕善何故與降虜交以糧餉之疏到急就往使受杖一百促責所餉時人恠之頃之蕃謀作亂伏誅

集覽

有辭觀通鑑釋文曰辭說也觀古玩

普自殺據坐禁止久之乃解

反後書孟達有才觀注觀猶神觀之觀也揚子修身
篇言重則有法好重則有觀注好重必謹則舉措可
觀觀去聲質實朱據吳人潘
翦章庶反濬武陵人

辛九年魏太和五年春二月吳武陵蠻叛吳主權遣潘
濬擊之吳黃龍三年

吳武陵五溪蠻叛吳主權遣太常潘濬討之武陵太
守衛旂奏濬姨兄蔣琬為諸葛亮長史濬密使相聞
欲以自託權曰承明不為此集覽旂字義與旌同質
也即封表示濬而免旂官承明潘濬表字

實武陵郡名注見靈帝中平三年張九韶曰五溪
蠻在武陵郡謂雄溪橫溪酉溪漁溪辰溪是也

丞相亮伐魏圍祁山質實祁山注見○自十月不雨至
建興六年

于三月

書法

自秦初書六月不雨至于八月丙寅年其後有書四月至于七月者矣獻帝興平元年率

不過三四月爾於是而書十月至于三月是半年也後此有書正月不雨至於十月者又甚矣哉宋庚午年西秦終綱目書某月不雨至於某月者六詳秦初丙寅年

○夏五月亮敗魏司馬懿于鹵城殺其將張郃

魏遣司馬懿屯長安督將軍張郃郭淮等以禦漢懿留精兵四千守上邽餘衆悉救祁山張郃欲分兵駐雍郃懿曰料前軍能獨當之者將軍言是也若不能當而分為前後此楚之三軍所以為黥布禽也遂進亮分兵攻祁山自逆懿於上邽魏將郭淮等徵亮亮破之因大芟其麥與懿遇于上邽之東懿斂軍依險

兵不得交亮引還懿躡其後至于鹵城又登山掘營不肯戰賈詡魏平數請戰曰公畏蜀如虎奈天下笑何懿病之乃使張郃攻南圍自按中道向亮亮使魏延等逆戰魏兵大敗懿還保營亮以糧盡退軍懿遣郃追之至木門與**集覽**注見靈帝中平六年徵亮徵亮戰中伏弩而卒**集覽**注見靈帝中平六年徵亮徵亮與邀通遮也木門地**質實**一統志云郭淮陽曲人上名在天水軍天水縣邽縣名注見光武建武八年魏延義陽人木門地名在鞏昌府秦州西南一百一十二里此楚軍所以為黥布禽事在高帝十一年

發明

司馬懿用兵如神算無遺策未易敵也然每與丞相亮交鋒動輒敗北是以其徒有畏蜀

如虎之譏而陳壽乃以將畧非亮所長貶之今觀綱目書此不曰亮敗魏軍而曰亮敗司馬懿者見其所對者勃敵而非脆敵亮能勝之則其將畧果有大過人者然則壽之妄肆譏評其說不攻自破

矣世以成敗論人若壽
輩者非一可勝歎哉

秋八月魏令其宗室王侯朝明年正月

魏黃初以來諸侯王法禁嚴切吏察之急親姻皆不
敢相通問東阿王植上疏曰堯之為教先親後疏自
近及遠周文王刑于寡妻至于兄弟以御于家邦今
陛下惠洽椒房恩昭九族羣后百寮番休遞上親理
之路通慶弔之情展誠可謂恕已治人推恩施惠者
矣至于臣者人道絕緒禁錮明時婚媾不通兄弟乖
隔又以一切之制永無朝覲之望至於注心皇極結
情紫闥神明知之矣然天實為之謂之何哉願陛下
沛然垂詔使諸國慶問四節得展妃妾之家膏沐之
遺歲得再通則聖世無不蒙施之物矣魏主叡報曰
諸國本無禁錮之詔矯枉過正下吏懼謹以至于此
耳已勅有司如王所訴植復上疏曰昔管蔡放誅周

召作弼叔魚陷刑叔向贊國三監之釁臣自當之二
南之輔求必不遠夫能使天下傾耳注目者當權者
是也權之所在雖疏必重執之所去雖親必輕蓋取
齊者田族非呂宗也分晉者趙魏非姬姓也吉專其
位凶離其患者異姓之臣也存共其榮歿同其禍者
公族之臣也今公族疏而異姓親臣竊惑焉不勝憤
懣拜表陳情獻優文答報而已至是乃詔曰先帝著
令不欲使諸王留京都者謂幼主在位母后攝政防
微漸關盛衰也朕不見諸王十有二載其令諸王及
宗室公侯各將適子一人朝明年正月後有少主母
后在宮者自

集覽

注心皇極注者心意所主也皇大極中也言注此心於大中之道膏

沐之遺遺唯季反文公詩傳曰膏所以澤髮者沐滌
首去垢者左傳哀十四年遺之潘沐注潘浙米汁可
以沐頭音芳袁反杜甫臘日詩口脂面藥隨恩澤翠
管銀罌下九霄注太平御覽載盧公家範凡臘日上

澡豆頭膏面脂口脂管蔡放誅周召作弼管叔鮮蔡
叔度周公旦皆武王弟召公奭周之支族武王滅紂
並封為諸侯武王崩成王少周公攝政管蔡作亂周
公以成王命誅管叔及蔡叔周召分陝為伯以輔弼
成王括地志云鄭州管城縣外城古管國也豫州北
七十里上蔡縣古蔡國也文公詩傳曰文王徙都于
豐而分岐周故地以為周召之采邑周國在岐山之
陽今鳳翔府岐山縣是也召國舊說扶風雍縣南有
召亭即此地叔魚陷刑叔向贊國叔向名肸姓羊舌
氏春秋晉公族叔魚名鮒叔向庶弟也叔向雖不專
晉國之政而晉之執政趙文子韓宣子皆訪之而後
行左傳昭十四年邢侯與雍子爭鄩田久而無成宣
子命叔魚斷舊獄罪在雍子雍子納女於叔魚叔魚
蔽罪邢侯邢侯怒殺叔魚與雍子於朝宣子問其罪
於叔向叔向曰雍子賂以買直鮒也鬻獄邢侯專殺
其罪一也乃施邢侯而尸雍子與叔魚於市向音享

三監之釁武王克殷以殷餘民封受子武庚命管蔡霍三叔監殷是謂三監武王崩三監叛成王命周公討之三監監古懺反二南之輔文王受命徙都于豐取岐州故地分爵周公召公以夾輔王室故詩有周南召南取齊者田族注見秦始皇三十四年田常分晉者趙魏注見周威烈王二十三年六卿正誤皇極今按皇極指人君所居之處猶言質實一統志宸極不當解為大中仍漢儒之誤也漢之縣名屬東郡晉屬濟北國隋屬濟北郡唐初屬濟陽郡後屬鄆州宋徙治新橋鎮屬東平府金元俱仍其舊本朝因之屬兗州府

書法

綱目周漢之篇書來朝多矣未有書令其朝者書令其朝何譏也魏法宗室母得朝覲通

往來至是始詔聽朝明年正月魏世親親之義亦薄甚矣故終魏之世無書來朝書令其朝也

發明

魏禁錮宗室甚嚴今乃書其令朝明年正月
豈予之乎許朝明年則前乎此未嘗得朝明

矣正所以
譏之也

中軍護李平有罪廢徙梓潼考異

軍當作都按分注李
嚴更名平亮以為中

都護又據四年書中都
護李嚴此軍字傳錄誤

丞相亮之攻祁山也命李嚴以中都護署府事更名
平會天霖雨平主督運恐糧不繼遣叅軍諭指呼亮
來還亮既退軍平乃更言軍糧饒足何為而退欲殺
督運以解不辦之責又表言軍偽退以誘賊亮出其
前後手書本末違錯平辭窮謝罪於是亮表其前後
過惡免官削爵土徙梓潼郡復以平子豐為中郎將
叅軍事出教勅之曰吾與君父子戮力以獎王室謂
至心感動終始可保何圖中乖乎若都護思負一意

君與公琰推心從事，否可復通，逝可復還也。亮又與蔣琬、董允書曰：「孝起前為吾說，正方腹中有鱗甲，鄉黨以為不可近。吾謂鱗甲者，但不當犯之耳。不圖復有蘇、張之事也。孝起者，陳震也。」**集覽**：公琰字孝起，前為吾說，正方孝起乃陳震字。前往日也。質，方正李平字蘇，張戰國時蘇秦、張儀言語反覆。

實

梓潼郡名，注見獻帝建安十八年。董允，南郡枝江人，和之子。蘇、張，注見漢獻帝建安十四年。

冬十月吳人誘敗魏兵於阜陵

吳主權遣中郎將孫布詐降於魏，以誘揚州刺史王凌。伏兵阜陵，以俟之。凌騰布書請兵迎之，征東將軍滿寵以為必詐，不與兵。而為凌作報書曰：「知欲避禍，就順甚相嘉尚。今欲遣兵相迎，然少則不足相衛，多則事必遠聞。且先密計以成本志，臨時節度其宜會。」寵被書入朝，又敕留府勿與兵。凌索兵不得，乃單遣

一督將步騎七百人往迎之布夜掩擊死傷過半先是凌表寵年過耽酒不可居方任魏主叡欲召寵還給事中郭謀曰寵有勲方岳二十餘年及鎮淮南吳人憚之若不如所表將為所闕可令還朝問東方事以察之叡從之既至體
質實
王凌太原祁人阜陵縣氣康彊乃慰勞遣還
名注見晉成帝咸和元年

發明

兵雖詭道特可用之一陣間至於伐國大事必以正大行之則兵勝而人服今吳人既以僭竊自立名義已索故其用兵攻魏率用盜賊小人之計是以前此書誘敗曹休今此書誘敗魏兵皆以著其詭詐之罪且以見吳人師出無名之失耳何足尚哉

十一月晦日食

壬子十年

魏太和六年
吳嘉禾元年

春三月魏主叡東巡

魏主叡幼女淑卒叡痛之甚追謚立廟葬于南陵取甄后從孫黃與之合葬追封黃為列侯為之置後襲爵欲自送葬又欲幸許司空陳群諫曰八歲下殤禮所不備况未期月而為制服舉朝素衣朝夕哭臨自古以來未有此比况欲自往視陵親臨祖載乎願陛下抑割有損無益之事此萬國之至望也又聞車駕欲幸許昌將以避凶夫吉凶有命禍福由人移徙求安則亦無益且吉士賢人猶不妄徙其家以寧鄉邑况帝王萬國之主行止動靜豈可輕脫也少府楊阜曰文皇帝武宣皇后崩陛下皆不送葬所以重社稷備不虞也何至孩抱亦集覽八歲下殤注見晉孝武帝太元十四年長殤祖子而送葬哉皆不聽

載記檀弓上篇主人既祖填池注祖謂移柩車去載處為行始也白虎通曰祖於庭何奪孝之思也注祖

始也始載於庭也乘車辭祖禰故為祖載許昌本漢
潁川郡長社縣魏文帝改名許昌故城在今縣西南
四十里質實一統志云許昌本周時許國之地名秦屬
潁川郡漢為韓國尋置許縣屬潁川郡東
漢末獻帝都於此曹魏改曰許昌晉徙潁川郡治此
北齊於此置南鄭州後周改許州治長社縣隋改縣
因潁川州為潁川郡唐初復為許州長社縣五代梁
置匡國軍唐改忠武軍宋陞為潁昌府金復為許州
昌武軍元為許州屬河南路本
朝以長社縣省入改屬開封府

吳遣使如遼東徙其騎都尉虞翻於蒼梧

吳主遣周賀等之遼東求馬初虞翻性疎直數有酒
失又好抵忤人多見謗毀吳主權嘗與群臣飲自起
行酒翻伏地陽醉權去翻起坐權大怒手劒欲擊之
劉基諫曰大王以三爵之後手殺善士雖翻有罪天

下孰知之權曰曹孟德尚殺孔文舉孤於虞翻何有
哉基曰大王躬行德義欲與堯舜比隆何乃自喻於
孟德翻由是得免權因敕左右自今酒後言殺皆不
得殺他日與張昭論神僊翻又指昭曰彼皆死人而
語神僊世豈有僊人也權積怒遂徙翻交州及周賀
等行翻聞之以為去人財以求馬既非國利而遼東
絕遠往恐無獲欲諫不敢作表以
集覽 三爵爵禮飲
示呂岱為人所白復徙蒼梧猛陵
可受一升記玉藻篇君子之飲酒也受一爵而色灑
如也二爵而言言斯禮已三爵而油油以退注灑如
肅敬貌言言和敬貌斯猶耳也油油悅敬貌以退謂
禮飲過三爵則敬殺可以去矣詩賓之初筵篇三爵
不識矧敢多又左傳宣二年臣侍君宴
過三爵非禮也猛陵縣名屬蒼梧郡
質實 劉基年
之子漢宗室也交州注見晉武帝太康元年交廣蒼
梧郡名注見武帝元鼎元年一統志云猛陵漢之縣

名屬蒼梧郡晉屬永平郡隋平陳郡廢置藤州治永平縣大業中州廢復置永平郡唐復為藤州天寶初改感義郡乾元初復為藤州治寧風縣宋徙治鐔津縣元因其舊本朝初改州為縣省鐔津縣入焉仍屬梧州府

秋九月魏治許昌宮○魏伐遼東不克還擊吳使者斬之

公孫淵數與吳通魏主叡使汝南太守田豫自海道幽州刺史王雄自陸道討之散騎常侍蔣濟諫曰凡非相吞之國不侵叛之臣不宜輕伐伐之不能制是驅使為賊也故曰狼虎當路不治狐狸先除大害小害自己今海表委質不乏職貢而議者先之正使克之無益於國儻不如意是為結怨失信也不聽豫等

往皆無功詔令罷軍時吳遣將軍周賀乘海求馬於
淵豫以賀等垂還歲晚風急必赴成山遂輒以兵據
之賀等還至遇風豫勒兵擊斬之集覽成山東濱海
權始思翻言召之會卒以其喪還盤陽在萊州東屬
路質實一統志云田豫漁陽雍奴人成山在登州
皇過黃鰲窮成山漢武帝幸東海
作朱鴈之歌拜日於成山即此

書法

魏書伐何淵受魏官也於
是數與吳通故一書伐

魏以劉曄為大鴻臚

魏侍中劉曄為魏主叡所親重叡將伐蜀朝臣皆諫
曄入贊議則曰可伐出與朝臣言則曰不可曄有膽
智言之皆有形中領軍楊暨嘗諫伐蜀叡曰卿書生
焉知兵事暨謝曰臣言誠不足采劉曄先帝謀臣蓋

亦云然。獻曰：「曄與吾言可矣。」暨曰：「請召質之。」乃召曄至。問之。曄終不言。後因獨見青獻。曰：「伐國大謀也。臣得與聞，常恐昧夢漏泄，為罪焉。敢向人言之。夫兵詭道也，未發不厭其密。陛下顯然露之，臣恐敵國已聞之矣。」獻謝之。曄出。青暨曰：「夫釣者中大魚則縱而隨之，須可制而後牽，則無不得也。人主之威，豈徒大魚而已乎？子誠直臣，然計不足，采不可，不精思也。」暨亦謝之。或謂獻曰：「曄不盡忠，善伺上意，所趨而合之。陛下試反意而問之，與所問反者，是曄常與聖意合也。」每問皆同者，曄之情必無所逃矣。獻驗之，果得其情。從此疏焉。曄遂發狂，出為大鴻臚。以憂死。傅子曰：「巧詐不如拙誠，信矣。」曄獨任才智，不敦誠慤，內失君心，外困於俗，卒以質實壽春人。

吳人擊魏廬江不克

陸遜引兵向廬江。魏人以為宜速救之。滿寵曰：「廬江雖小，將勁兵精守，足經時。況賊舍船二百里來，後尾空絕，不來尚欲誘致。今宜聽其遂進，但恐走不可及耳。」乃整軍趨揚宜口。吳人聞之，夜遁。時吳人歲有北計，寵上疏曰：「合肥城南臨江湖，北遠壽春，賊來攻圍，必據水為執。官兵救之，當先破賊，然後圍解。賊往甚易，救之甚難。然其西三十里有奇險，可依更宜立城，徙見兵以固守。此為引賊平地而掎其歸路，於計為便。」蔣濟以為如此，既示天下以弱，且望賊煙火而壞城。此為未攻而自拔，一至於此。劫畧無限，必以淮北為守矣。魏主叡疑之。寵重表曰：「孫子言兵者，詭道也。故能而示之不能，形實不必相應也。又曰：『善動敵者，形之；今賊未至而移城却，內引賊遠，水擇利而動，所謂形而誘之也。』尚書趙咨以寵策為長，乃報聽之。」

集覽

孫子史記孫子武者齊人也。吳王

質實

廬江郡名，注見

景帝五年孫武注見唐玄宗
開元二十四年趙咨南陽人

癸丑十一年魏青龍元年春正月青龍見魏摩陂井中二

月魏主叡往觀之集覽摩陂在古邾鄆魏明帝以龍見改名龍陂晉為河南縣

書法

觀龍不書據晉武帝太康五年見武庫井中帝觀之不書此何以書遠也故特書往

發明

龍在天之物而見於井中其殆芳髦失位之兆乎叡往觀之不知警省故書以示譏

○吳遣使拜公孫淵為燕王

公孫淵遣校尉宿舒等奉表稱臣於吳吳主權大悅遣太常張彌執金吾許晏等將兵萬人金寶珍貨九錫備物乘海授淵封為燕王舉朝皆諫以為淵未可信但可遣兵吏護送其使而已權不聽張昭曰淵肯

魏懼討遠來求援非本志也若淵改圖欲自明於魏
兩使不反不亦取笑於天下乎權反覆難昭昭意彌
切權不能堪案刀而怒曰吳國士人入官則拜孤出
宮則拜君孤之敬君亦為至矣而數於衆中折孤孤
常恐失計昭熟視曰臣雖知言不用每竭愚忠者誠
以太后臨崩呼老臣於牀下顧命之言故在耳因涕
泣橫流權擲刀於地與之對泣然卒遣彌晏往
昭稱疾不朝權土塞其門昭於內以土封之

夏閏五月朔日食○六月魏洛陽宮鞠室災○公孫淵
斬吳使者獻首於魏魏封淵為樂浪公

淵知吳遠難恃乃斬張彌等首傳送於魏魏拜淵大
司馬封樂浪公吳主權聞之大怒曰朕年六十世事
難易靡所不嘗近為鼠子所前却令人氣踊如山不
自截鼠子頭以擲于海無顏復令萬國就令顛沛不

以為恨陸遜上疏曰陛下破操烏林敗備西陵禽羽
荊州斯三虜者當世雄傑而皆摧其鋒矣方將蕩平
華夏總一大猷今乃不忍小忿而輕萬乘之重違垂
堂之戒此臣之所惑也臣聞行萬里者不中道而輟
足圖四海者不懷細而害大今彊寇在境荒服未庭
乃遠惜遼東之衆與馬而捐江東萬安之業乎僕射
薛綜尚書陸瑁亦上疏曰北寇與國壤地連接苟有
間隙應機而至所以越海求馬於淵者為此故也而
更棄本追末捐近治遠忿以改規激以動衆斯乃猾
虜所願聞非大吳之至計也且沓渚去淵道里尚遠
今到其岸兵勢三分使彊者進取次當守船又次運
糧行人雖多難得悉用若淵狙詐與北未絕動衆之
日唇齒相濟若其不然畏威遠遁使天誅稽於朔野
山虜乘間而起恐非萬安之長慮也權乃止數遣人
慰謝張昭昭固不起權忽出過其門呼昭昭辭疾篤
權燒其門以恐之昭亦不出乃滅火駐門良久昭諸

子共扶昭起權載以還宮深自克責昭乃朝會初彌
等至襄平淵欲圖之乃先分散其吏兵中使秦旦張
羣杜德黃彊等六十人置玄菟旦等議曰吾觀此郡
形勢甚弱若焚其城郭殺其長吏為國報恥然後伏
死足以無恨孰與偷生苟活長為囚虜乎於是陰相
結約未發為人所告旦等皆走時群病疽創著鄒不
能前乃推旦彊使前德留守羣採菜果食之旦彊行
數日得達句驪因宣權詔於其王位官位宮即使人
迎群德并遣還吳奉表稱

集覽

為鼠子所前却呼淵
曰鼠子憎賤之也前

臣旦等至吳皆拜校尉

却軒輕之義言為淵所侮沓沓水名

質實

樂浪郡
名注見

遼東有沓氏邑襄平城名遼東郡所理

武帝元封三年烏林峯名注見獻帝建安二十年西

陵縣名注見周赧王三十六年荊州注見獻帝建安

十二年薛綜沛郡竹邑人陸瑁吳郡人遜之弟襄平

縣名注見秦王政三年玄菟郡名注見武帝元封三

年句驪東夷國名注
見新莽始建國四年

吳主權自將攻魏新城不克

吳主權出兵欲圍新城以其遠水積二十餘日不敢
下船滿寵謂諸將曰孫權得吾新城必於衆中有自
大之言今來雖不敢至必當上岸耀兵以示有餘乃
潛遣步騎六千伏肥水隱處權果上岸伏軍卒起擊
之斬首數百或

集覽

新城合

質實

新城注見延熙十
六年肥水詳注見

齊主寶卷

永元二年

以馬忠為庾亮都督

庾亮都督張翼用法嚴夷帥劉胄叛丞相亮以叅軍
馬忠代翼召翼令還其人謂翼宜速即罪翼曰吾臨

戰場代人未至當運糧積穀為滅賊之資豈可以黜退之故而廢公家之務乎於是統攝不懈代到乃發忠因其資**集覽**庾降都督按南中八郡志庾降本南破冑斬之中地名音來絳武侯征南中因以名官即罪即**質實**張翼武陽人馬忠閬中人就而伏罪

甲寅十二年

魏青龍二年吳嘉禾三年

春二月丞相亮伐魏

初丞相亮勸農講武作木牛流馬運米集斜谷口治邸閣息民休士三年而後用之至是悉衆十萬由斜谷伐魏遣使約**集覽**木牛流馬武侯出軍至祁山始吳同時大舉**集覽**以木牛運後出斜谷以流馬運杜佑通典注按亮集督軍廖立杜叡胡忠等推意作木牛流馬其木牛法方腹曲脰一股四足頭入領中舌著於腹載多而行少特行者數十里群行者三十里曲者為牛頭雙者為牛脚橫者為牛領轉者為牛

足覆者為牛背方者為牛腹垂者為牛舌曲者為牛肋刻者為牛齒立者為牛角細者為牛鞅攝者為牛鞅軸牛御雙轅人行六尺牛行四步人不大勞牛不飲食其流馬法尺寸之數肋長三尺五寸廣三寸厚二寸二分左右同前軸孔分墨去頭四寸徑中二寸前腳孔分墨去頭四寸五分長一寸五分廣一寸前杠孔去前腳孔分墨二寸七分孔長二寸廣一寸後軸孔去前杠孔分墨一尺五寸大小同後杠孔去後腳孔分墨二寸二分後杠孔分墨四寸五分前杠長一尺八寸廣二寸厚一寸五分後杠與等板方囊二枚板厚八分長二尺七寸高一尺六寸五分廣一尺六寸每板受米二斛三斗從上杠孔去肋下七寸前後同上杠孔去下杠孔分墨一尺三寸孔長一寸五分廣七分八孔同前後四脚廣二寸厚一寸五分形制如象鞍長四寸徑面四寸三分孔徑中三脚杠長二尺一寸廣一寸五分厚一寸四分鞍居言反弓衣

也質實

斜谷注見成帝元延三年褒斜

三月魏山陽公卒考證

下當分注諡曰漢孝獻皇帝○謹按凡例曰凡正統之君廢為

王公而死者書卒而註其諡後倣此

質實

山陽國名注見獻帝建安二十五年

魏主叡素服發喪山陽傳國至晉永嘉中乃為外蕃所滅

書法

山陽公自廢至是十五年矣於是書卒書魏山陽公美存厚也陳留卒書姓名山陽則曷

為不書漢帝故不忍書也然則安樂公非帝乎安

樂異世非漢比也是故山陽公不書姓名唐鄭公

不書姓名自魏山陽公十五年卒其後晉安樂公

劉禪八年卒歸命侯孫皓四年卒陳留王曹奐三

十八年卒魏啓之也山陽傳國至晉永嘉始為外

蕃所滅魏於前代可謂厚矣終綱目滅國之君書

卒六山陽晉安樂歸命陳留陳
叔寶後唐楊溥書薨一唐鄴公

夏四月魏大疫崇華殿災○丞相亮進軍渭南魏大將

軍司馬懿引兵拒守亮始分兵屯田考異

上條夏字
上漏圈字

丞相亮至郿軍於渭水之南司馬懿引軍渡渭背水
為壘以拒之謂諸將曰亮若出武功依山而東誠為
可憂若西上五丈原諸將無事矣亮果屯五丈原郭
淮曰亮若跨渭登原連兵北山隔絕隴道搖蕩民夷
非國之利也懿乃使淮先據北原塹壘未成漢兵大
至淮逆擊却之亮以前者數出皆以運糧不繼使已
志不伸乃分兵屯田為久駐之基耕者雜
於渭濱居民之間而百姓安堵軍無私焉**集覽**
武功名
屬扶風括地志云雍縣南七里故釐城一名武功在
渭水南藍屋縣西界今乾州武功縣是五大原在扶

風郿縣

質實

郿縣名注見靈帝中平六年渭水注見域中高帝五年一統志云武功秦之縣名以

武功山水為名舊在郿縣境東漢徙治古釐城晉屬始平稷後魏改美陽縣後周復為武功縣唐改屬京兆府五代唐時屬鳳翔府尋還屬京兆府宋割屬醴州金改為武亭縣元復為武功縣屬乾州本朝因之改屬西安府五丈原在鳳翔府郿縣西三十里漢諸葛亮據渭南與魏司馬懿相拒屯兵即此處北山注見文

帝三年

五月吳主權擊魏秋七月魏主叡自將擊却之

吳主權入居巢湖口向合肥新城眾號十萬又遣陸遜諸葛瑾入江夏沔口向襄陽孫韶張承入淮向廣陵淮陰魏滿寵欲率兵救新城將軍田豫曰賊欲質新城以致大軍耳宜聽使攻城挫其銳氣候其疲怠

然後擊之可大克也若便進兵適入其計矣散騎常侍劉劭曰可先遣步騎數千揚聲進道引出賊後擬其歸路要其糧道賊必震怖遁走不戰自屈矣寵又欲拔新城守致賊壽春魏主敵不聽曰先帝東置合肥南守襄陽西固祁山賊來輒破於三城之下者地有所必爭也縱權攻新城必不能拔敕諸將堅守吾將自往攻之比至度權已走矣乃使秦朗督步騎二萬助司馬懿拒漢勅懿但堅守以挫其鋒彼進不得志退無與戰久停則糧盡虜畧無所獲則必走走而追之全勝之道也乃御龍舟而東滿寵募壯士焚吳攻具吳吏士多病又聞敵至遂退陸遜遣人奉表於權為魏邏者所得諸葛瑾聞之甚懼與遜書速其去遜未荅方催人種葑豆與諸將奕棊射戲如常瑾來見遜遜曰今兵將意動且當自定以安之施設變術然後出耳今若便退賊謂吾怖而來相盛必敗之勢也乃密與瑾立計令瑾督舟船遜悉上兵馬以向襄

陽城魏人素憚遜名遽還赴城瑾便引船出遜徐整部伍張拓聲勢步趨船魏人不敢逼行到白圍託言往獵遣周峻等擊江夏新市

集覽

葑豆葑蕒菁也豆菽也

質實

安陸石陽斬獲千餘人而還一統志云巢湖在廬州府巢縣西一十五里一名焦湖周圍四百餘里港汊大小三百六十占合肥舒城廬江巢四邑之境漢永平中湖嘗出黃金郡國志昔有巫言居巢縣門石龜口出血當陷為湖未幾有人以猪血戲塗之巫見之驚走地果陷又青瑣高議古巢一日江水暴漲尋復故道溝有巨魚萬斤三日乃死合郡皆食之獨一姥素好善不食忽有老叟曰此吾子也不幸罹此禍汝不食其肉吾將厚報之東門石龜目赤城當陷姥日往視有稚子欺之以朱傅龜目姥見急登山而城陷為湖江夏郡名注見獻帝建安十三年沔口注同上年襄陽縣名注見獻帝建安十二年廣陵郡名注見武帝元朔五年淮南國淮陰

縣名注見獻帝建安元年劉劭邯鄲人諸葛瑾琅邪陽都人亮之兄新市地名注見新莽地皇三年安陸縣名注見新莽地皇二年石陽漢之縣名屬江夏郡東漢廢之故城在黃州府黃陂縣西吳征江夏圍石陽不克而還即此孫韶富春人本姓俞孫策愛之賜孫姓列之屬籍

八月魏葬漢孝獻皇帝于禪陵質實

一統志云禪陵在懷慶府脩武縣北

葬漢獻帝以其禪位于魏故名

書法

書魏葬予存厚也終綱目滅國之君書葬五山陽公晉陳留王宋晉恭帝陳梁孝元帝石

晉故唐主惟晉恭帝弑書葬故譏之

○丞相武鄉侯諸葛亮卒于軍長史楊儀引軍還前軍

師魏延作亂儀擊斬之考證

擊斬當作討誅

亮數挑戰懿不出乃遺以巾幘婦人之服懿怒上表請戰魏主叡使衛尉辛毗杖節為軍師以制之姜維謂亮曰賊不復出矣亮曰彼本無戰情所以固請者以示武於衆耳將在軍君命有所不受苟能制吾豈千里而請戰邪亮遣使者至懿軍懿問其寢食及事之煩簡而不及戎事使者曰諸葛公夙興夜寐罰二十已上皆親覽焉所啖食不至數升懿告人曰孔明食少事煩其能久乎亮病篤帝使僕射李福省侍因諮大計與亮語已別去數日復還亮曰孤知君還意公所問者公琰其宜也福謝前實失不諮請公百年後誰可任大事者故輒還耳又請其次亮曰文偉可又問亮不答八月薨長史楊儀整軍而出百姓奔告懿懿追之姜維令儀反旗鳴鼓若將向懿者懿不敢偪於是儀結陳而去入谷然後發喪策贈印綬謚曰

忠武百姓為之諺曰死諸葛走生仲達懿聞之笑曰
吾能料生不能料死故也亮嘗推演兵法作八陣圖
至是懿案行其營壘嘆曰天下奇才也追至赤岸不
及而還初前軍師魏延勇猛過人善養士卒每欲請
兵萬人與亮異道會于潼關如韓信故事亮不許延
常謂亮怯不能盡用已才儀為人幹敏亮每出軍儀
規畫分部籌度糧穀咸取辦焉延性矜高當時皆下
之唯儀不假借延以為至忿亮深惜二人之才不忍
偏廢也費禕使吳吳主曰楊儀魏延牧豎小人雖嘗
有鳴吠之益然已任之勢不得輕若一朝無諸葛亮
必為禍亂諸君憤憤獨不知慮此乎禕曰儀延不協
起於私忿而無黥韓難御之心今方掃除疆賊混一
孟夏功以才成業由才廣若防其後患舍而不用是
猶備風波而逆廢舟楫非長計也亮病篤作退軍節
度令延斷後姜維次之延或不從軍即自發亮薨儀
令費禕往揣延意延曰丞相雖亡吾自見在府親官

屬便可將喪還葬。吾自當率諸軍擊賊。云何以一人死廢天下之事邪？且魏延何人，當為楊儀作斷？後將乎？儀等乃案亮成規，引還延果大怒，撓儀未發，率所領先歸，燒絕閣道，與儀相表叛逆。一日之中，羽檄交至。帝以問董允。蔣琬咸保儀而疑延。儀等棧山通道，晝夜兼行，亦繼延後。據南谷口，逆擊儀等將軍何平叱先登曰：「公亡身尚未寒，汝輩何敢？」乃爾士卒知曲在延，皆散延逃奔漢中。儀遣將斬之，夷三族。始延欲殺儀等，冀時論以已代諸葛輔政，故不北降魏而南擊儀，實無反意也。初，亮表於帝曰：「臣成都有桑八百株，薄田十五頃，子弟衣食自有餘饒，不別治生以長尺寸。臣死之日，不使內有餘帛，外有贏財，以負陛下。至是卒如其言。」長史張裔嘗稱亮曰：「公賞不遺遠，罰不阿近，爵不可以無功取，刑不可以貴勢免。此賢愚所以僉忘其身者也。」陳壽曰：「亮為相國，撫百姓，示儀軌，約官職，從權制，開誠心，布公道，盡忠益時者雖

讐必賞犯法怠慢者雖親必罰服罪輸情者雖重必釋游辭巧飾者雖輕必戮善無微而不賞惡無纖而不貶庶事精練物理其本循名責實虛偽不齒終於邦域之內畏而愛之刑政雖峻而無怨者以其用心平而勸戒明也可謂識治之良才管蕭之亞匹矣○初長水校尉廖立自謂才名宜為亮副快快怨謗亮廢立為民徙之汶山及亮薨立垂泣曰吾終為左衽矣李平聞之亦發病死平常冀亮復收已得自補復策後人不能故也習鑿齒曰昔管仲奪伯氏駢邑三百沒齒而無怨言聖人以為難亮使廖立垂泣李嚴致死豈徒無怨言而已哉夫水至平而邪者取法鑑至明而醜者亡怒以其無私也况大人君子懷樂生之心流矜恕之德法行於不可不用刑加乎自犯之罪爵之而非私誅之而不怒天下有不服者乎

覽

巾幘幘古獲反婦人喪冠也以巾上覆髮如帕之類又音古對反續漢輿服志夫人紺繒幘釋名皇

集

后首飾上有垂珠步則搖之八陣圖武侯八陣圖凡三一在沔陽之小平舊壘一在廣都之八陣鄉一在魚復永安宮南江灘水上其法六十四陣天衡十六陣居兩端地軸十二陣居中問天前衝四陣居右後衝四陣居左地前衝六陣居前後衝六陣居後風八陣附天雲八陣附地合為八陣天衡併前後衝二十四陣合風八陣為三十二陽地軸併前後衝二十四陣合雲八陣為三十二陰遊兵二十四陣在六十四陣之後凡行軍結陣合戰設疑補闕全在遊兵天地之前衝為虎翼風為蛇蟠兵家先陰以右為前又風從虎虎與蛇皆陰類同位西北也天地之後衝為飛龍雲為鳥翔兵家後陽以左為後又雲從龍龍與鳥皆陽類同位東南也以天地風雲為四正以龍虎鳥蛇為四奇所謂八陣也每以二陣相從一陣之中又有兩陣一戰一守中外有輕重之權陰陽有剛柔之節彼此有虛實之地主客有先後之數按漢禮儀志

立秋之日兵官皆肄孫吳兵法六十四陣則是古有之非武侯創為也方輿勝覽及少陵詩注與此別今未暇錄不假借不以溫辭悅色禮下之也假借並去聲混一函夏猶言混一中原也函謂函谷關關之東為中夏故曰函夏見在府見讀曰現府謂行軍之幕府羽檄魏武帝奏事曰令邊有警輒露檄插羽按此言則是以鳥羽插於檄曰羽檄以示疾速若飛策後人策料後之人必不復收錄我也

正誤承

雖亡吾自見在府親官屬便可將喪還葬今按吾自見在當為句府字屬下句

質實

一統志云楊儀

襄陽人文偉費禕表字諸葛武侯八陣圖凡三一在成都府新都縣北三十里牟彌鎮者一百二十有八當頭陣法也一在夔州府城南者六十有四方陣法也一在漢中府沔縣東南一十里定軍山下者二百五十有六下營法也其陣聚細石為之各高五尺皆布列相當中間相去九尺正中間南北巷悉方廣五

尺各六十四聚或為人散亂及為夏水所沒水退復如故又有二十四聚作兩層其後每層各十二聚晉桓溫伐蜀經之以為常山蛇勢潼關注見獻帝建安十六年費禕江夏人南谷口未詳處所唯臨洮府渭源縣西二十五里有南谷山未知是否黥韓謂黥布韓信管蕭謂管仲蕭何赤岸未詳處所唯漢中府城西有赤崖乃諸葛亮與兄瑾書云前趙子龍退師燒壞赤崖以北閣道即此未知此處是否張裔成都人長水校尉注見順帝陽嘉二年廖立武陵人汶山郡名注見武帝元鼎六年

書法

凡書卒于軍嘉死事也故具官爵姓亮自書出屯漢中以圖中原至是凡五書伐魏一書

戰街亭敗績二書圍陳倉斬其將三書拔武都陰平四書敗司馬懿殺張郃於是書進軍書屯田皆可紀也唯街亭一敗馬謖之罪耳亮方為足食計而以卒于軍書矣綱目書卒于軍八未有以丞相

書者書丞相武鄉侯諸葛亮卒于軍軍國之可痛
深矣此綱目所甚惜也自是至晉諸臣卒具官爵
者十二人諸葛亮司馬孚司馬攸張軌溫嶠陶侃
王導郝鑒何充謝安袁宏桓沖○書軍還可矣書
楊儀何嘉儀也於是新喪元
帥全軍而歸儀可謂能權矣

發明

嗚呼亮自經畧中原至是首尾僅八載綱目
五書伐魏一戰街亭一次成固一圍陳倉祁

山一拔武都陰平一斬王雙敗司馬懿殺張郃至
於是舉書進軍渭南分兵屯田懿雖引兵拒守甘
受中輟婦人之服勢已窮蹙而亮乃告終天不祚
漢使之功業不就謂之何哉然亮受遺託孤之際
蓋嘗以竭股肱之力効忠貞之節繼之以死為告
至其出軍上表又以鞠躬盡力死而後已為言由
今觀之可謂不食其言矣書卒于軍以見歿於王
事之實其討賊之義死而不屈至今凜凜猶有生

氣其視曹馬輩欺孤弱寡孤媚以取人家國者曾犬虱之不若世豈可以成敗論人物哉不有綱目特書屢書表而出之則孔明亦若而人耳噫

以吳懿爲車騎將軍督漢中蔣琬爲尚書令總統國事

時新喪元帥遠近危悚琬拔處羣僚之右既無戚質容又無喜色神守舉止有如平日由是衆望漸服質

實

漢中郡名注見周赧王四年

遣中郎將宗預使吳

吳人聞諸葛亮卒恐魏乘衰取蜀增巴丘守兵萬人欲以爲救援二欲以事分割漢人聞之亦增兵永安以備非常預至吳吳主權問之對曰東益巴丘之戍西增白帝之守皆事勢宜然俱不足以相問也權

嘉其抗直禮之亞於鄧芝

質實

宗預南陽安衆人巴丘山名注見

昭烈帝章武二年白帝城名注見獻帝建安十七年

吳以諸葛恪爲丹陽太守

恪以丹陽山險民多果勁自求爲官出之三年可得甲士四萬衆議以丹陽地執險阻與吳郡會稽新都番陽四郡鄰接周旋數千里山出銅鐵自鑄甲兵俗好武尚氣仗兵野逸時覩間隙出爲寇盜戰則蠶至敗則鳥竄自前世所不能羈皆以恪計爲難恪父瑾聞之亦歎曰恪不大興吾家將赤吾族也恪盛陳其必捷吳主權乃拜爲**質實**諸葛恪琅邪陽都人瑾之丹陽守使行其策子丹陽郡名注見明帝永平十三年會稽郡名注見和帝永元元年吳郡注見獻帝建安五年新都郡名注見獻帝建安十三年番

陽郡名注見
秦二世二年

冬十一月魏洛陽地震○吳潘濬平武陵蠻質實

潘濬
武陵

人武陵郡名注見

靈帝中平三年

乙卯

十三年

魏青龍三年
吳嘉禾四年
春正月魏太后郭氏卒

魏主叡數問甄后死狀於
太后由是太后以憂卒

書法

不書以憂卒何
罪不在魏主也

中軍師楊儀有罪廢徙漢嘉自殺

楊儀既殺魏延自以爲宜代諸葛亮秉政而亮平生
密指以儀狷狹意在蔣琬儀至成都拜中軍師無所

統領儀自以年宦先琬才能踰之由是怨憤形于聲色後軍師費禕往慰省之儀語曰往者丞相初亡吾若舉軍就魏處世寧當落度如此邪禕

集覽

落度不得志貌

度音

質實

一統志云漢嘉東漢之縣名屬蜀郡晉於縣置漢嘉郡元魏廢之故址在雅州名山

縣境內

夏四月以蔣琬爲大將軍錄尚書事費禕爲尚書令○

魏作洛陽宮

魏主叡好土功既作許昌宮又治洛陽宮起昭陽太極殿築總章觀高十餘丈力役不已農桑失業陳群諫曰昔禹承唐虞之盛猶卑宮室而惡衣服況今喪亂之後人民至少邊境有事乎昔劉備多作傳舍興

費人役太祖知其疲民也今中國勞力亦吳蜀之所願此安危之機也惟陛下慮之獻答曰王業宮室亦宜並立滅賊之後豈可復興役邪此君之職蕭何之大畧也羣曰昔漢祖已滅項羽宮室焚燒是以蕭何建武庫太倉皆是要急然高祖猶非其壯麗今二虜未平誠不宜與古同也且人之所欲莫不有辭况乃王者莫之敢違若必欲作之固非臣下言辭所屈若卓然回意亦非臣下所及也漢明帝欲起德陽前殿鍾離意諫而止後復作之謂羣臣曰鍾離尚書在不得成此殿也夫王者豈憚一臣蓋爲百姓也獻爲之少省○獻耽于內寵自貴人以下至掖庭灑掃凡數千人廷尉高柔諫曰周禮天子后妃以下百二十人既已盛矣竊聞後庭之數今復過之聖嗣不昌殆或由此臣愚以爲可妙簡淑媛以備內官之數其餘盡遣還家且有精養神專靜爲寶則螽斯之徵可庶而致矣獻報之曰輒克昌言他復以聞是時獵法嚴

峻殺禁地鹿者身死財產沒官柔復上疏曰百姓供
役田者既減復有鹿暴所傷不貲至如滎陽左右周
數百里畧無所入方今天下生財者少而麋鹿之損
者多請除其禁○獻又欲平北芒作臺觀以望孟津
衛尉辛毗諫曰天地之性高高下下今欲反之既非
其理加以損費人功民不堪役獻乃止少府楊阜上
疏曰堯尚茅茨而萬國安其居禹卑宮室而天下樂
其業及至殷周或堂崇三尺度以九筵耳桀作璇室
象廊紂作傾宮鹿臺以喪其國楚靈築章華而身受
禍秦皇作阿房二世而滅夫不度萬民之力以從耳
目之欲未有不亡者也陛下當以堯舜殷周爲法桀
紂楚秦爲戒而乃自暇自逸惟宮室是飾必有危亡
之禍矣君作元首臣爲股肱存亡一體得失同之臣
雖驚怯敢忘斯義言不切至不足以感寤陛下謹叩
棺沐浴伏俟重誅獻感其忠手筆詔答獻常著襦被
縹綾半袖阜問曰此於禮何法服也獻默然自是不

法服不見阜阜又上疏欲省宮人乃召御府吏問後
宮人數吏對曰禁密不得宣露阜怒杖而數之曰國
家不與九卿爲密反與小吏爲密乎廩愈嚴憚之○
散騎常侍蔣濟上疏曰昔句踐養胎以待用昭王恤
病以雪仇今二敵彊盛當身不除百世之責也以陞
下神武舍其緩者專心討賊臣以爲無難矣中書侍
郎王基上疏曰古人以水喻民曰水所以載舟亦所
以覆舟顏淵曰東野子之御馬力盡矣而求進不已
殆將敗矣今事役勞苦男女離曠願陛下深察東野
之敝留意舟水之喻漢文之時唯有同姓諸侯賈誼
憂之以爲置火積薪之下而寢其上今寇賊未殄猛
將擁兵檢之則無以應敵久之則難以遺後使賈誼
復起必深切於曩時矣○殿中監督役擅收蘭臺令
史僕射衛臻奏案之詔曰殿舍不成吾所留心卿推
之何也臻曰古制侵官之法非惡其勤事也誠以所
益者小所墮者大也臣每察校事類皆如此若又縱

之懼羣司遂將越職以至陵夷矣尚書孫禮固請罷
役詔曰欽納讜言促遣民作監者復奏留一月禮徑
至作所稱詔罷之獻雖不集覽堯尚茅茨史記堯之
能盡用直言然皆優容之
茅茨不翦注以茅覆屋曰茨堂崇三尺度以九筵周
禮冬官考工記殷人重屋堂崇三尺周人明堂度九
尺之筵東西九筵南北七筵注重屋王宮正堂也崇
高也明堂明政教之堂筵席也每筵長九尺謂東西
之廣爲八丈一尺南北之廣爲六丈三尺著襦著服
之也襦小兒及蠻夷之頭衣被縹綾半袖被衣之也
縹善治反青白色也半袖短袂衣國家天子之稱也
注見武帝元光五年句踐養胎以待用先是吳伐越
越王句踐保棲會稽後吳赦越句踐反國遂令國中
壯者無娶老妻老者無娶壯婦女子十七未嫁丈夫
二十不娶父母有罪將免身者以告於孤令醫守之
生男二醵以壺酒一犬生女二醵以壺酒一豚生子

三孤以乳母其子欲仕量其居好其衣飽其食而簡
銳之後卒伐吳而滅之見吳越春秋昭王恤病以雪

仇先是齊伐燕殺燕君噲其太子平立是為昭王弔
死問孤與百姓同甘苦後國內殷富士卒皆樂戰遂

使樂毅伐齊齊君地出走其相淖齒殺之古人以水
喻民荀子哀公篇孔子曰君者舟也庶人者水也水

則載舟水則覆舟君以此思危則危將焉而不至矣
又見孔子家語六本篇東野子之御孔子家語顏回

篇魯定公問顏回曰子聞東野畢之善御乎對曰善
則善矣其馬將必佚後三日牧來訴曰東野畢之馬

佚兩驂曳兩服入于廐公聞之召回問曰子謂其馬
將佚奚以知之回曰以政知之昔舜巧於使民不窮

民力造父巧於使馬不窮馬力是以舜無佚民造父
無佚馬今東野畢之御升車執轡御體正矣步驟馳

騁朝禮畢矣歷險致遠馬力盡矣而猶求進不已臣
是以知之且聞人窮則詐馬窮則佚自古未有窮其

下而能無危者也又荀子哀公篇佚作失注失讀曰逸奔逸也御體作街體注街與馬體各得其正也

質實

高柔陳留圉人螽斯之徵螽斯蝗屬詩國風篇螽斯羽詵詵兮宜爾子孫振振兮榮陽縣名注

見秦莊襄王元年北芒山名注見靈帝中平六年孟津注見帝玄更始二年鹿臺注見唐高祖武德四年阿房宮名注見秦始皇三十五年章華臺名注見武帝建元五年王基曲城人衛臻陳留襄邑人孫禮涿郡人蘭臺注見章帝元和元年漢明帝起德陽前殿鍾離意諫而止事在永平三年

書法

魏主叡即位九年書大營宮室立聽訟觀治許昌宮用民多矣去年書崇華殿災天意亦

可知也於是又作洛陽宮焉其逆天戒亦甚矣繼有崇華殿災之書宜哉

秋七月魏崇華殿災

魏主獻以殿災問太史令高堂隆曰此何咎也對曰
易傳曰上不儉下不節孽火燒其室又曰君高其臺
天火爲災人君務飾宮室不知百姓空竭故天應以
旱火從高殿起也又詔問隆漢柏梁災而大起宮殿
以厭之其義云何對曰此越巫所爲非聖賢之訓也
今宜罷遣民役清掃所災之處不敢有所立作則蕙
莆嘉禾必集覽漢柏梁災漢武太初元年柏梁臺災
生其地矣遂作建章宮以厭勝之厭益涉
反襍也勝服也蕙莆音雲甫白虎通曰瑞草也王者
孝道至則蕙莆生昔堯之時生於庖厨葉大於門不
搖自掬飲質實高堂隆泰
食以助供山平陽人

書法一崇華也兩年兩災天戒凜凜
矣綱目悉書之所以戒土木也

八月魏立子芳爲齊王詢爲秦王

魏主獻無子養二王爲己子宮省事祕莫知其所由來者或云芳任城王楷之子也

魏復立崇華殿

魏主獻復立崇華殿更名九龍通引穀水過殿前爲玉井綺欄蟾蜍含受神龍吐出使博士馬鈞作司南車水轉百戲作者三四萬人凌霄闕始構有鵲巢其上魏主以問高堂隆對曰詩曰惟鵲有巢惟鳩居之今始構闕而鵲巢之天意若曰宮室未成身不得居將有他姓制御之耳天道無親惟與善人今宜休罷百役增崇德政則可以轉禍爲福矣獻性嚴急督修宮室有稽限者親召問之言猶在口身首已分散騎常侍王肅諫曰陛下臨時所刑皆有罪之吏也然衆庶不知謂爲倉卒願下之吏暴其罪而誅之無使汙宮掖而爲遠近所疑且人命至重難生易殺是以聖賢重之昔漢文帝欲殺犯蹕者張釋之曰方其時上

使誅之則已今下廷尉廷尉天下之平不可傾也臣
以爲大失其義廷尉天子之吏也猶不可以失平而
天子之身反可以惑謬乎斯重於爲已

集覽

司南車

黃帝與

蚩尤戰於涿鹿蚩尤起大霧將士不知所之帝遂作
指南車周成王時越裳氏重譯來獻使者迷失歸路
周公錫駢車以指南後其器俱亡漢張衡魏馬鈞繼
作其器無傳宋武平長安得此車而製不精祖冲之
復造之後魏太武使郭善明造彌年不就又命馬岳
造垂成而爲善明鵠死其法遂絕唐元和中典作金
公元以是車及記里鼓上之憲宗以備法駕晋志云
刻木爲僊人衣以羽衣立車上車雖回轉而手常指
南大駕出爲先導

質實

穀水注見唐閔帝應順元年
漢文帝欲殺犯蹕者張釋之

之乘以正四方

云云事在
文帝三年

書法

前再書崇華殿災矣於是再立逆天戒孰甚焉故書復玄宗更集僊爲集賢則書集賢唐

開元十三年

於是更名九龍殿則曷爲不書不書

九龍書崇華所以著其逆天戒也是故秦不恤人怨而作阿房則書復秦二世元年魏不畏天戒而立崇華則書復是年終綱目作宮殿書復者二而已

冬十月魏中山王哀卒質實

中山國名注見周威烈王二十三年

哀疾病令官屬曰男子不死於婦人之手亟以時成東堂堂成輿疾往居之又令世子曰汝幼爲人君知樂不知苦必將以驕奢爲失者也兄弟有不良之行當造鄰諫之諫之不從流涕喻之喻之不改乃白其母猶不改當以奏聞并辭國土與其守寵罹禍不若貧賤全身也此亦謂大罪惡耳其微過細故當掩覆

之遂卒

魏殺鮮卑軻比能

先是軻比能誘保塞鮮卑步杜根以叛殺魏將軍蘇尚董弼二人遂走幕北復殺步杜根至是幽州刺史王雄使人刺殺之種質實幽州注見唐高落離散邊陲遂安祖武德四年

魏張掖涌石負圖

張掖柳谷口水溢涌寶石負圖狀象靈龜立於川西有石馬七及鳳凰麒麟白虎犧牛璜玦八卦列宿字彗之象又有文曰大討曹詔書班天下以為嘉瑞任令于綽以問鉅鹿張錞錞曰夫神以知來不追已往祥兆先見而後廢興從之今漢久亡魏已得之何所追興祥兆乎此石當今之變異而將來之符瑞也

集覽

犧牛宗廟之牲也色純曰犧璜璜半璧佩下

縣之令

質實

一統志云張掖漢之郡名取張國臂掖

任音壬

質實

之義後又置屬國都尉以主蠻夷降者

魏晉並因之後魏改張掖軍尋改軍爲郡又置西涼
州西魏更名甘州取州東甘浚山泉味甘冽爲名周
復爲張掖郡唐初爲甘州天寶初復爲郡乾元初復
爲甘州宋初爲西夏所據改鎮夷郡又改宣德府元
改甘肅路尋改爲甘州路本朝初爲甘肅衛尋分置
甘州左右中前後五衛隸陝西行都指揮使司任漢
之縣名屬廣平國東漢屬鉅鹿郡晉屬廣平郡後趙
石氏改置苑鄉縣尋改爲清苑縣屬襄國郡隋初復
改爲任縣屬邢州後省之唐復置宋省入南和尋復
改屬信德府金屬邢州元省入邢臺縣尋復置屬順
德路本朝因之改屬順德府鉅
鹿郡名注見靈帝中平元年

書法

有書隕石者矣有書立石者矣未有書涌石者涌石負圖而文曰大討曹天之棄曹氏也

決矣而詔頒天下以爲嘉瑞亦愚矣哉終綱目書隕石十二石立二書涌石一而已

魏以馬易珍物於吳

魏主廆使人以馬易珠璣翡翠玳瑁於吳吳主權曰此皆孤所不用而可以得馬孤何愛焉與之

書法

前書徵珍物譏玩物也至以有用易無用書曰以馬易甚譏之

丙十四年

魏青龍四年春吳鑄大錢

一當五百

書法

書大錢何譏也於是書大錢一當五百失輕重之中矣書大錢始此終綱目書大錢六

年延熙元年吳丁亥年宋唐肅宗
乾元元年二年五代己未年唐

三月吳婁侯張昭卒

昭容貌矜嚴有威風吳主權以下皆憚之
卒年八十一遺令幅巾素冠歛以時服
質實一統志云

婁秦之縣名屬會稽郡漢初因之東漢及魏晉皆屬
吳郡隋省唐始置華亭縣屬蘇州五代晉時屬秀州
宋改秀州爲嘉興府而華亭仍爲屬邑元陞縣爲華
亭府隸嘉興路尋改爲松江府以府北有松江故名
本朝因之
直隸京師

夏四月帝如湔觀汶水旬日而還集覽

如湔觀汶水如蜀
往也地理志蜀

郡有湔縣湔水出玉壘山按玉壘山
又在汶山郡汶川縣東汶江在焉
質實一統志云湔
漢之縣名屬

廣漢郡晉併入漢州故城在成都府城東北一百二十
三里汶水在成都府城南七里乃蜀守李冰所穿之江
通成都皆可行
舟溉田萬頃

書法

凡書觀譏也旬日而還甚譏之也是故桓帝
之幸馮石府書留飲十日後主之觀汶水至

旬日而還皆
譏之譏也

發明

觀魚于棠春秋特筆以譏之丞相亮卒至是
未及再期而後帝所爲已若此書觀汶水旬

日而還則其慢棄國政遠事逸遊忽社稷之重縱
耳目之慾而當時大臣亦無能諫止其惡其失皆
具見於直筆之間矣雖無緣
崖之寇尚能久有其國乎

○武都氏王苻健降質實

武都氏注見武帝
元鼎六年武都郡

○冬十月

有星孛于大辰又孛于東方

魏高堂隆上疏曰古者將營宮室宗廟爲先居室爲後今郊廟未定而崇飾居室士民失業外人咸云宮人之用與軍國之資畧齊民不堪命皆有怨怒夫采椽卑宮唐虞大禹之所以垂皇風也玉臺瓊室夏癸商辛之所以犯昊天也今宮室過盛天彗章灼斯乃慈父懇切之訓當崇孝子祗聳之禮不宜有忽以重天怒魏主叡不悅侍中盧毓進曰臣聞君明則臣直古之聖王惟恐不聞其過此臣等所以不及隆也叡意乃解毓集覽有星孛于大辰注大辰春秋昭十七年有星植之子也集覽孛于大辰注大辰房心尾也公羊傳大火爲大辰伐爲大辰北辰亦爲大辰注大火謂心左傳心爲大火是也伐參伐也大火與伐天所以示民時早晚天下所取正故謂之大辰北辰北極天之中也常居其所心伐所在故曰亦也心者天子明堂

布政之宮亦爲宇。彗者邪亂之氣，掃故置新之象也。又有星字于東方，注見武帝元封元年米椽太史公自序曰：墨者亦尚堯舜道，言其德行曰堂高三尺，采椽不刮，正義曰：採取木爲椽，桷不刮削也。卑宮孔子曰：卑宮室而盡力乎溝洫。夏癸夏帝履癸天下謂之夏桀，商辛商帝辛天下謂之商紂。正誤：米今按史記註：米櫟木也。漢書作採註：柞木也。即櫟木。質實：盧毓涿郡人。

書法

元封之元嘗書又字矣。然書秋不書月，則同時也。未有同月書又字者，一月再字甚大異。

也終綱目書字不一。三國書又字者再若其一月再字則是年而已矣。

魏司空陳群卒

群前後數上封事，輒削其草。雖子弟莫知也。或譏其居位拱默及正始中，詔撰名臣奏議，朝士乃見群諫。

事皆嘆息馬袁子曰或云楊阜豈非忠臣哉人主之
非則勃然觸之與人言未嘗不道答曰夫仁者愛人
施之君謂之忠施之親謂之孝今爲人臣直詆其君
之非而播揚其惡可謂直士未爲忠臣也若陳群則
不然談論終日未嘗言人主之非書數十
上外人不知君子謂群於是乎長者矣

魏令公卿舉才德兼備之士

時司馬懿以兗州刺史王昶應選昶爲人謹厚名其
兄子曰默曰沈子曰渾曰深爲書戒之曰吾以四者
爲名欲爾曹顧名思義不敢違也夫物速成則疾亡
晚就則善終朝華之草夕而零落松柏之茂隆寒不
衰是以君子戒於闕黨也夫能屈以爲仲讓以爲得
弱以爲彊鮮不遂矣毀譽者愛惡之原而禍福之機
不可輕也人或毀已當退而求之於身若已有可毀
則彼言當矣無可毀則彼言妄矣當則無怨於彼妄

則無害於身又何報焉諺曰救寒莫如重裘止謗莫如自修斯言善矣

質實

兗州注見獻帝興平

二年王昶
晉陽人

丁十五年

魏景初元年
吳嘉禾六年

春正月魏黃龍見以三月爲夏

四月

高堂隆以魏得土德故其瑞黃龍見宜改正朔易服色以變民耳目魏主叡從之遂以建丑之月爲正服

色尚黃
牲用白

書法

建丑也然則書以三月爲四月可矣書夏四月何譏非古也三代改正不改月數漢初承

秦建亥書冬十月則秦漢雖改正而其爲冬自若也今改月數以三爲四末論也而以春爲夏是變

易四時之實矣故書夏譏之終綱
目書改正五詳始皇二十六年

夏六月魏地震

書法

綱目書地震一百一而漢世居九十地道之變未有多於漢者也自是五十年不書地震

至晉武太康九年而後書迄綱目之終所書亦不過當十之一豈地道之安其常哉記注蓋多畧矣

○魏以陳矯爲司徒

矯初爲尚書令劉曄嘗譖之矯懼其子竊曰主上明聖大人大臣今若不合不過不作公耳尚書郎廉昭以才能得幸好挾摘羣臣細過以媚上嘗奏左丞罰當關不依詔抵罪矯當連坐黃門侍郎杜恕上疏曰陛下憂勞萬機或親燈火而庶事不康刑禁日弛原其所由非獨臣不盡忠亦委任不專而俗多忌諱故

也臣以爲忠臣不必親親臣不必忠有疏者毀人而
陛下疑其私報所憎譽人而陛下疑其私愛所親左
右或因之以進憎愛之說遂使疏者不敢毀譽至於
政事損益亦有所嫌陛下當思所以廣朝臣之心屬
有道之節反使如廉昭者擾亂其間臣懼大臣遂將
容身保位坐觀得失也昔周公戒魯侯曰不使大臣
怨乎不以言不賢則不可爲大臣爲大臣則不可不
用也故能者不敢遺其力而不能者不得處非其任
今陛下於羣臣知其不盡力也而代之憂其職知其
不能也而教之治其事豈徒主勞而臣逸哉雖聖賢
並世終亦不能以此爲治也陛下又患臺閣禁令不
密人事請屬不絕作迎客出入之制以惡吏守寺門
斯未得爲禁之本也昔漢安帝時少府竇嘉辟廷尉
郭躬無罪之兄子猶見奏劾近司隸校尉孔羨辟大
將軍狂悖之弟而有司嘿然蓋陛下自無必行之罰
以絕阿黨之原耳夫糾擿姦宄忠事也然而世憎小

人行之者以其不顧道理而苟求容進也若陛下不
考其終始必以違衆忤世爲奉公密行白人爲盡節
焉有通人大才而不能此邪誠顧道理而弗爲耳使
天下皆背道而趨利則人主之所最疾者也陛下何
樂焉恕畿之子也○魏主叡嘗卒至尚書門矯跪問
曰陛下欲何之曰欲案行文書耳矯曰此自臣職分
非陛下所宜臨也若臣不稱職請就黜退叡慙而反
叡嘗問矯司馬公忠貞可謂社稷之臣乎矯曰朝廷
之望也社稷未之知也

集覽

怨乎不以句絕以用也密

正誤

當罰

關不依詔今按東觀漢記汝郁徵詣公車臺遣兩當
關扶入文選絕交書註漢置當關之職欲曉即至門
呼人使起此言尚書左丞曹璠行罰於當關之人而
不依詔令故廉昭奏其罪陳矯爲尚書令當連坐也

質實

陳橋東陽人郭羽陽
翟人杜畿杜陵人

魏制三祖爲不毀之廟

魏有司奏以武皇帝爲太祖文皇帝爲高祖今皇帝爲烈祖三祖之廟萬世不毀詔從之孫盛曰夫諡以表行廟以存容未有當年而逆制祖宗未終而豫自尊君魏之羣臣於是乎失正矣

秋七月魏擊遼東不利公孫淵自稱燕王

公孫淵數對國中賓客出惡言魏主叡欲討之以母丘儉爲幽州刺史儉上疏曰陛下即位以來未有可書吳蜀恃險未可卒平卿可以此方無用之士克定遼東光祿大夫衛臻諫曰淵生長海表相承三世外撫戎夷內修戰射而儉欲以偏軍長驅朝至夕卷妄矣不聽使儉率諸軍屯遼東南界壘書徵淵淵遂發兵逆儉於遼隧儉與戰不利引軍還淵因自立爲燕王改元紹漢置百官誘鮮卑以擾北方

集覽

母丘複姓顏師古曰母丘曼丘本是一姓語有慢急耳母音無遼隧縣名屬遼東郡隧本作隊然亦音遂

質實

一統志云母丘儉聞喜人遼隧漢初縣名屬渤海郡晉因之隋以後俱爲永豐縣遼改僊鄉縣

金廢之故城在遼東海州衛西六十里三國魏時公孫淵裨將拒司馬懿即此處

皇后張氏崩考證

下當補書葬敬哀皇后于南陵○謹按凡例曰凡正統之后特葬曰葬某

諡皇后于某陵陳壽志云後主敬哀皇后建興十五年薨葬南陵

○九月魏大水○魏

主獻殺其后毛氏

郭夫人有寵於魏主獻毛后愛弛獻遊後園曲宴極樂夫人請延皇后獻不許因禁左右不得宣毛后知之明日謂獻曰昨遊北園樂乎獻以左右泄之殺十餘人因賜后死

書法

魏嘗書殺夫人甄氏矣不斥魏主丕於是而斥魏主叡何甚叡也毛氏不得與宴薄有問

焉常情也而賜之死叡亦忍甚矣哉綱目書殺其

后二是年毛氏晉穆帝永和十一年秦梁氏廢而殺之三詳桓帝延熹八年爲人所殺不與焉

冬十月魏營圓方丘南北郊

魏用高堂隆議營洛陽南委粟山爲圓丘詔曰漢承秦亂廢無禘禮曹氏世系出自有虞今祀皇皇帝天

於圓丘以虞舜配祭皇皇后地於方丘以舜妃伊氏配祀天神於南郊以武帝配祭地祇於北郊以武宣

皇后集覽圓方丘南北郊群書考索曰古者祀天於南郊而地上之圓丘者南郊之丘也丘圓

而高所以象天此所謂爲高必因丘陵也祭地於北郊而澤中之方丘者北郊之丘也丘方而下所以象

地此所謂爲下必因川澤也泰壇南郊之壇也以之
燔柴泰圻北郊之坎也以之瘞埋言泰壇則自然之
丘言泰圻則人爲之壇也祭禮必於自然之丘所以
致敬瘞瘞必於人爲之壇所以盡宗廟之禮禘位禮
記祭法虞夏禘黃帝殷周禘帝嚳注此禘謂祭昊天
於圓丘也續漢書三年一祫祫以冬十月五年一禘
禘以夏四月源流至論曰論禘祫之義者鄭玄謂祫
大於禘王肅謂禘大於祫賈逵謂一祭二名此諸儒
之說異同也然祫則合食而已毀廟未毀廟之主皆
合食於太祖非唯天子有祫而諸侯皆得有祫禘則
禘其祖之所自出如禮記祭法唯天子有禘而諸侯
不得有禘此禘尊祫卑誠萬世常行之典鄭賈說皆
非也又祫祭注見平帝元始五年地祇說文地神提
出萬物者也祇字古作示禮大宗伯掌地示之禮

質實

一統志云委粟山在河南府城東三十里
魏明帝景初間營爲圓丘至今形制尚存

書法

圓方丘澤高下之義古也皆取諸丘非矣既立圓方丘又有南北郊益非矣故書識之下

書晉并圓方丘之祀於南北郊善晉也

丙戌年

吳以諸葛恪爲威北將軍

恪至丹陽移書屬城長吏令各保疆界明立部伍從化平民悉令屯居乃內諸將羅兵幽阻但繕藩籬不與交鋒俟其穀稼將熟輒縱兵芟刈使無遺種平民屯居畧無所犯於是山民饑窮稍稍自首恪復厚慰撫之敕下不得拘執曰陽長胡伉得舊惡民困迫暫出者縛送府恪以伉違教斬以徇民間聞之老幼相攜而出歲期人數皆如本規恪自領萬人餘分給諸將吳主權嘉其功拜爲威北將軍封都鄉侯徙屯廬江皖

集覽

乃內句絕令屯居於內地也曰陽

正誤

從

平民悉令屯居乃內諸將羅兵幽阻今按當於居字句絕乃內屬下句內當音納三國志諸葛恪傳作乃分內質寶丹陽郡名注見明帝永平十三年都鄉縣諸將名注見章帝章和二年廬江郡名注見景帝五年一統志云皖口地名在安慶府城西一十里一名山口鎮

魏鑄銅人起土山於芳林園

魏主廡徙長安鍾簾索佗銅人承露盤於洛陽盤折聲聞數十里銅人重不可致大發銅鑄銅人二號曰翁仲列坐於司馬門外又鑄黃龍鳳凰置內殿前起土山於芳林園使公卿皆負土樹雜木善草捕禽獸致其中司徒掾董尋上疏曰建安以來野戰死亡或門殫戶盡雖有存者遺孤老弱若宮室狹小當廣大之猶宜隨時不妨農務况作無益之物哉陛下既尊羣臣顯以冠冕載以華輿而使穿方舉土沾體塗足

毀國之光以崇無益甚無謂也孔子曰君使臣以禮臣事君以忠無忠無禮國何以立臣知言出必死而自比於牛之一毛生既無益死亦何損秉筆流涕心與世辭臣有八子死後累陛下矣將奏沐浴以待命獻曰尋不畏死邪主者奏收之詔勿問○高堂隆上書曰今之小人好說秦漢之奢靡以蕩聖心取亡國不度之器以傷德政非所以興禮樂之和保承明之休也況今吳蜀欲與中國爭衡若有人來告權禪並修德政輕省租賦動咨耆賢事尊禮度陛下聞之豈不惡其如此而爲國憂乎若告者曰彼並爲無道崇侈無度重其賦歛民不堪命陛下聞之豈不幸彼疲敝而取之不難乎苟如此則可易心而度事義之數亦不遠矣亡國之主自謂不亡然後至於亡賢聖之君自謂亡然後至於不亡今天下彫敝若有寇讐臣懼版築之士不能投命虜庭矣又將吏俸祿稍見折減不應輸者今皆出半此爲官入兼多於舊其所出

與參少於昔而度支經用更每不足反而推之凡此
諸費必有所在矣獻覽之曰觀隆此奏使朕懼哉○此
尚書衛覲上疏曰今議者多好悅耳其言政治則比
陛下於堯舜其言征伐則比二虜於狸鼠臣以爲不
然四海之內分而爲三羣士陳力各爲其主是與六
國分治無以異也武皇帝之時後宮食不過一肉衣
不用錦綉茵蓐不緣飾器物無丹漆用能平定天下
遺福子孫當今宜計校府庫量入爲出猶恐不及而
工役不休侈靡日崇帑藏日竭昔漢武信神僊之道
謂當得雲表之露以餐玉屑故立僊掌以承高露陛
下通明每所非笑漢武有求於露而猶尚見非陛下
無求於露而空設之糜費功夫皆聖慮所宜裁制也
○時有詔錄奪士女前已嫁爲吏民妻者還以配士
太子舍人張茂上書曰陛下天之子也百姓吏民亦
陛下子也今奪彼以與此亦無以異於奪兄之妻妻
弟也於父母之恩偏矣又縣官以配士爲名實內之

掖庭其醜惡乃出與士得婦者未必喜而失妻者必有憂夫君天下而不得萬姓懽心者鮮不危殆且軍

師在外日費千金而後庭無錄之女椒房母后之家賞賜橫與其費半軍加以尚方作玩弄之物後園建

承露之盤斯誠快耳目之觀然集覽鐘簾簾與鑠通亦足以聘寇賊之心矣皆不聽

十六年索佗始皇所鑄銅索駝也銅駝注見晉惠帝太安元年銅人即始皇所鑄金人注見秦始皇二十

六年酈道元云魏文帝徙咸陽金人十二重不可致因留霸城南即與明帝所徙銅人事畧同竟未詳其

旨承露盤漢武作柏梁臺金莖銅柱承露盤高二十丈大七圍上有僊人掌以承露和玉屑飲之可以長

生西都賦抗僊掌以承露擢雙立之金莖穿方顏師古曰穿治也古謂掘地為阬曰方今荆楚俗土工築

作算程課者猶以方計故曰穿方前書尹賞傳脩治長安獄穿治方深各數丈易心而度易更改也度謀

也折減折音舌耗也錄奪士女錄質實一統志云芳
收拾也奪攘取也士女軍士之女質實林園在河南

府城東北隅乃魏明帝所
建齊王芳改爲鞏林園

書法

秦鑄金人不書此其書何秦不足責踵秦者
可責也故靈帝鑄銅人則書中平二年魏鑄

銅人則書是年書起土山何譏勞民也書起土

山始此終綱目書起土山二是年丙戌年宋

發明

魏叡承業以來土木之工不已今又鑄銅人
起土山綱目皆詳書於冊所以爲後世侈靡

者之
戒也

魏光祿勳高堂隆卒

隆疾篤口占上疏曰三代之有天下歷數百載尺土
一民莫非其有然癸辛縱欲皇天震怒宗國爲墟紂

梟白旗桀放鳴條天子之尊湯武有之豈伊異人皆
明王之胄也黃初之際天兆其戒異類之鳥育長燕
巢此大異也宜防鷹揚之臣於蕭牆之內可選諸王
使典兵基時鎮撫皇畿翼亮帝室夫皇天無親惟德
是輔民詠德政則延期過歷下有怨嘆則輟錄授能
由此觀之天下乃天下之天下非獨陛下之天下也
魏主叡手詔慰勞之未幾而卒陳壽曰隆學業脩明
志存匡君因變陳戒發於懇誠忠矣哉及至必改正
朔俾魏祖虞所謂

集覽

口占隱度其辭口以授人曰
口占章豔反癸辛注見建

意過其通者與
興十四年紂梟白旗梟掛首木上也武王伐紂至紂
死所射之三發以黃鉞斬其頭縣於太白之旗故曰
梟桀放鳴條放逐也鳴條地名湯放桀戰於鳴條之
野蔡氏書傳曰鳴條在安邑西按安邑桀都也異類
之鳥黃初四年有鵜鴟鳥集於靈芝池鷹揚之臣指
司馬懿也鷹揚注見桓帝延熹元年恭時時丈里反

立也兵宜如棊之布立俾魏祖虞隆以曹氏世系出自虞舜鳴條地名注見桓帝永興元年

魏作考課法不果行

魏主叡深疾浮華之士詔吏部尚書盧毓曰選舉勿取有名名如畫地作餅不可啖也毓對曰名不足以致異人而可以得常士常士畏教慕善然後有名非所當疾也愚臣既不足以識異人又主者止以循名案常爲職但當有以驗其後耳古者敷奏以言明試以功今考績之法廢而以毀譽爲進退故真偽渾雜虛實相蒙叡納其言詔散騎常侍劉邵作都官考課法七十二條下百官議司隸崔林曰周官考課其文備矣康王而下遂以陵夷蓋法存乎其人也且萬目不張舉其綱衆毛不整振其領若大臣能任職則孰敢不肅烏在考課哉杜恕曰明試以功三考黜陟帝王之盛制也然其法可廢依其文難脩舉蓋世有亂

人而無亂法若法可專任則唐虞不須稷契之佐殷
周無貴伊呂之輔矣今欲使州郡考士必由四科皆
有事效然後察舉試辟公府爲親民長吏轉以功次
補郡守者或就增秩賜爵此最考課之急務也臣以
爲當用其言使爲課州郡之法法其施行必以賞罰
隨之至於三公坐而論道內職大臣納言補闕無善
不紀無過不舉焉有守職辨課而可以致雍熙者哉
誠使容身保位無放退之辜而盡節在公抱見疑之
執公義不脩而私議成俗雖仲尼爲課猶不能盡一
才又況於世俗之人乎司空掾傅嘏曰建官均職清
理民物所以立本也循名考實糾勵成規所以治末
也本綱未舉而制末程國畧不崇而先考課懼不足
以料賢愚之分精幽明之理也議竟不行司馬公曰
爲治之要莫先用人而知人聖賢所難也故求之毀
譽則愛憎競進而善惡混殽考之功狀則巧詐橫生
而真偽相冒要其本在至公至明而已矣蓋公明者

心也功狀者迹也已之心不能治而以考人之迹不亦難乎為人上者誠能不以親疎貴賤異其心喜怒好惡亂其志雖詢於人而決之在已雖求於迹而察之在心則群下之能否燁然形於目中無所逃矣安得豫為之法而悉委有司哉苟親貴不能而任職疎賤賢才而見遺所喜好者敗官不去所怒惡者有功不錄則雖復為之善法而繁其條目又安能得其真乎或曰內外之官以千萬數考察黜陟人君豈能獨任其事哉曰凡為人上者不特人君而已公卿刺史太守各用此道以考察黜陟其在下之人而為人君者亦用此道以考察黜陟公卿刺史太守則奚煩勞之有或曰考績之法唐虞所為京房劉邵述而脩之耳曰唐虞之官居位久而受任專立法寬而責成遠故鯀之治水九載弗成然後治其罪禹之治水九州攸同然後賞其功非若房邵校米鹽之課責旦夕之效也事固有名同而實異者不可不察也○初衛臻

典選舉蔣濟遺之書曰漢祖遇亡虜爲上將周文拔
漁父爲太師布衣廝養可登王公何必試而後用臻
曰子欲同牧野於成康喻斷蛇於文景好不經之舉
開拔奇之津將使天下馳騁而起矣盧毓論選皆先
性行而後言才人或問之毓曰才所以爲善也故大
才成大善小才成小善今稱有才而不能爲善是才
不中器也時

集覽

陵夷言法度頽替若丘陵之漸平
故古雅反漢祖遇亡虜爲上將遇

待也韓信先事項羽後亡歸漢故曰亡虜漢祖拜爲
大將周文拔漁父爲太師拔擢也姜太公避紂居東
海間文王作興遂西釣渭濱文王出獵而遇之載歸
而用以爲師同牧野於成康周成王康王太平之世
難同武王伐紂戰於牧野時喻斷蛇於文景漢文帝
景帝守成之主不比高帝斬蛇之時中器中去聲當
也器謂
名器

質實

崔林東武城人傳
礧北地泥陽人

戊午 延熙元年

魏景初二年
吳赤烏元年

春正月魏遣太尉司馬懿擊

遼東考異

提要擊
作伐

魏主叡召司馬懿於長安使將兵四萬討遼東議臣或以爲兵多難供叡曰四千里征伐雖云用奇亦當任力不當計役費也因謂懿曰公孫淵將何計以待君對曰棄城豫走上計也據遼東拒大軍其次也坐守襄平此成禽耳曰三者何出對曰唯明智能審量彼我乃豫有所割棄此非淵所及必先拒遼東後守襄平也曰還往幾日對曰往百日攻百日還百日以六十日爲休息如此一年足矣淵聞之復遣使稱臣求救於吳吳人欲戮其使羊衢曰不可是肆匹夫之怒而捐霸王之計也不如因而厚之遣奇兵潛往以要其成若魏伐不克而我軍遠赴是恩結避夷義形萬里若兵連不解首尾之隔則我虜其傍郡驅畧而

歸亦足以報雪曩事矣吳主權乃大集覽要其成要

勒兵謂淵使曰請俟後問當從簡書約成和也

報雪曩事報雪謂報讐雪恥也曩事曩日之事也先

公孫淵稱臣於吳吳遣使拜爲燕王使至俱被殺

質實

遼東郡名注見秦王政三年襄平縣名注同上年

二月魏以韓暨爲司徒

魏主叡問盧毓誰可爲司徒者毓薦處士管寧叡不能用更問其次對曰敦篤至行則太中大夫韓暨亮

直清方則司隸崔林貞固純質實管寧朱虛人韓

粹則太常常林乃以暨爲之暨南陽堵陽人

立皇后張氏考證

當作立貴人張氏爲皇后○謹按凡

爲皇后陳壽志云後主張皇后前后敬哀之妹也建興十五年入爲貴人延熙元年春正月策貴人爲皇后

○立子璿爲皇太子

大司農孟光問太子讀書及情性好尚於秘書郎郤
正正曰奉親虔恭舉動仁恕有古世子之風光曰此
皆家戶所有耳吾欲知其權畧智調何如也正曰世
子之道在於承志竭歡既不得妄有施爲智調藏於
胸懷權畧應時而發此之有無焉可豫知也光曰今
天下未定智意爲先諸君讀書寧當效吾等竭力博
識以待訪問如博士探策講試以**集覽**探策探試取
求爵位邪當務其急者正深然之**集覽**探策探試取
所問何策試取而答之即所謂射策也漢書音義作
簡策難問列置案上在試者意投射取而答之謂之
射策若錄政化得失**質實**孟光洛陽人郤正偃師人
顯而問之謂之對策

吳鑄當千大錢

書法

先是吳鑄大錢一當五百矣不書書大錢此其書當千何非常也當五百大矣當千甚哉

直書重識之終綱目書大錢六莫大於當千者矣詳建興十四年

○秋八月魏司馬懿克遼東斬公孫淵

六月司馬懿軍至遼東公孫淵使其將卑衍等將步騎數萬屯遼隧圍塹二十餘里諸將欲擊之懿曰此欲以老吾兵也攻之正墮其計且賊大衆在此其巢窟空虛直指襄平破之必矣乃多張旗幟欲出其南衍等盡銳趣之懿潛濟水出其北直趣襄平行等恐引兵夜走諸軍進至首山淵復使衍等逆戰懿擊破之遂進圍襄平秋大霖雨遼水暴漲運船自遼口徑至城下雨月餘不止平地水數尺三軍恐欲移營懿令軍中敢有言徙者斬都督令吏犯令斬之軍中乃定賊恃水樵牧自若諸將欲取之懿皆不聽司馬陳

珪曰昔攻上庸八部並進晝夜不息故能一旬之半
拔堅城斬孟達今者遠來而更安緩愚竊惑焉懿曰
達衆少而食支一年我軍四倍於達而糧不淹月以
一月圖一年安可不速以四擊一正令失半而克猶
當爲之是以不計死傷與糧競也今賊衆我寡賊飢
我飽水雨乃爾功力不設雖當促之亦何所爲自發
京師不憂賊攻但恐賊走今賊糧垂盡而圍落未合
掠其牛馬抄其樵采此故驅之走也夫兵者詭道善
因事變賊憑衆恃雨故雖飢困未肯束手當示無能
以安之取小利以驚之非計也朝廷聞師遇雨咸欲
罷兵魏主叡曰懿臨危制變禽淵可計日待也雨霽
懿乃合圍作土山地道楯櫓鉤衝晝夜攻之矢石如
雨淵窘急糧盡人相食八月使其相王建柳浦請解
圍却兵當君臣面縛懿命斬之檄告淵曰楚鄭列國
鄭伯猶肉袒牽羊迎之孤天子上公而建等欲使退
舍豈得禮邪二人老耄傳言失指已相爲斬之若意

有未已可更遣年少有明決者來淵復遣侍中衛演
乞克日送任懿謂演曰軍事大要有五能戰當戰不
能戰當守不能守當走餘二事惟降與死耳汝不肯
面縛此為決就死也不須送任既而城潰淵將數百
騎突圍走懿擊斬之遂入城誅其公卿以下及兵民
七千餘人築為京觀遼東帶方樂浪玄菟四郡皆平
淵之將反也將軍綸直賈範等苦諫淵皆殺之懿乃
封其墓而顯其遺嗣釋淵叔父恭之囚遂班師初淵
兄晃為恭任子在洛陽先淵未反數陳其變及淵謀
逆歡不忍市斬欲就獄殺之廷尉高柔曰仲尼亮司
馬牛之憂祁奚明叔向之禍晃信有言宜貸其死苟
自無言便當市斬今進不赦其命退不彰其罪臣恐
四方或疑此舉也不聽竟遣集覽昔攻上庸事在建
使齋金屑飲之賜以棺斂興五年上庸注見
周赧王十一年楯櫓楯與盾通堅尹反兵器也所以
蔽身扞目者櫓大盾也鈞衝注見宋文帝元嘉二十

八年面縛注見炎興元年鄭伯猶肉袒牽羊迎之索
隱曰肉袒謂袒裼而露肉也賈逵曰牽羊示服為臣
隸也左傳宣十二年楚子圍鄭鄭伯肉袒牽羊以迎
退舍左傳僖二十五年晉侯圍原退一舍而原降注
一舍三十里送任任保也送子為質以保其不失信
京觀觀去聲積戰死之尸封土其上以彰克敵之功
謂之京觀京大觀示也封土之上為屋如觀闕形也
又注見唐太宗貞觀五年仲尼亮司馬牛之憂亮寬
解也司馬牛問君子子曰君子不憂不懼蓋牛以其
兄桓魋將為亂心常負憂故孔子因其問而解之祁
奚明叔向之禍祁奚姓名春秋晉大夫叔向名肸姓
羊舌氏庶弟名虎皆晉公族也左傳襄二十一年晉
之執政范宣子殺欒盈之黨叔虎與焉宣子并囚叔
向祁奚聞之見宣子曰鯨殛而禹興奈何以虎而棄
社稷宣子說以言諸平
公而免之向香兩反

正誤

仲尼亮司馬牛之憂
今按韻書亮照察也

質

實遼隧縣名注見建興十五年首山注見武帝元鼎四年遼水注見昭烈帝章武元年

吳中書郎呂壹伏誅

吳主權使中書郎呂壹典校官府州郡文書壹因此作威福深文巧詆排陷無辜毀短大臣纖介必間太子登數諫不聽群臣莫敢復言壹誣故江夏太守刁嘉謗訕國政收繫驗問時同坐人皆畏壹並言間之侍中是儀獨云無間窮詰累日詔旨轉厲儀終無變辭嘉遂得免陸遜潘濬憂壹亂國每言之輒流涕壹白丞相顧雍過失權怒詰責雍謝云謂壹曰此公免退潘太常得無代之乎壹曰近之云曰潘常切齒於君今日代顧公恐明日便擊君矣壹懼乃解散雍事濬詣建業欲極諫聞太子數言不聽乃大請百寮欲因會殺之為國除患壹知之稱疾不行左將軍朱據部曲應受三萬緡工王遂詐而受之壹疑據自取考

問主者死於杖下據無以自明籍草待罪典軍吏劉助覺言遂取權大感寤曰朱據見枉况吏民乎乃賞助百萬窮治壹罪顧雍至廷尉見壹和顏色而問之曰君意得無欲有所道乎壹叩頭無言時尚書郎懷叙面詈辱壹雍責敘曰官有正法何至於此徐衆曰雍可謂長者矣然問所欲道則非也壹姦險亂法毀傷忠賢今乃開引其意儻獲原宥豈大臣忠主疾惡之義哉○壹既伏誅權因遣人告謝諸大將問時事所當損益諸將皆不敢有所言權復以詔責之曰子瑜子山義封定公皆不肯有所陳而伯言承明涕泣危怖有不自安之心聞之悵然深自刻恠夫惟聖人能無過行明者能自見耳人之舉厝何能悉中獨當已有以傷拒衆意忽不自覺故諸君有嫌難耳與諸君從事自少至長髮有二色義雖君臣恩猶骨肉榮福喜戚相與共之忠不匿情智無遺計事統是非諸君豈得從容而已哉齊桓有善管子未嘗不歎有過

未嘗不諫諫而不得終諫不止今孤自省無桓公之德而諸君諫諍未嘗出口仍執嫌難以此言之孤於

齊桓良優未知諸

集覽

深文巧詆漢書注深文謂文

君於管子如何耳

集覽

法深刻巧穿鑿也詆丁禮反

顏師古曰詆誣也言不公平也是儀姓名吳志云是儀本姓氏孔融嘲之曰氏字民無上乃改為是焉謝

宏姓名宏音乎萌反王遂王遂姓名也工其官名

藉草注見成帝鴻嘉三年藉橐懷敘姓名也子瑜諸

葛瑾表字子山步騭表字義封朱然表字定公呂岱

表字伯言陸遜表字承明潘濬表字刻恠刻通作克

痛責也恠亦責也恠中猶言皆當也中竹仲反有嫌

難耳嫌疑也難猶不肯也謂諸君皆避嫌疑而難於

陳言也事統是非謂凡事有是有非從容如淳**正誤**

曰從子勇反容讀曰勇顏師古曰謂獎勸也

從容今按從當音七容切**質實**顧雍吳郡人是儀北

容如字謂其舒肆自在也**質實**海人懷敘未詳出處

無由
攷究

冬十二月蔣琬出屯漢中質實

漢中郡名注見周赧王四年

○魏主

叡有疾立郭夫人為后召司馬懿入朝以曹爽為大將軍

初魏太祖以劉放孫資為祕書郎文帝更命祕書曰中書以放為監資為令遂掌機密魏主叡即位尤見寵任時親總萬機數興軍旅腹心之任皆二人管之每大事朝臣會議常令決其是非擇而行之中護軍蔣濟上疏曰臣聞大臣太重者國危左右太親者身蔽古之至戒也往者大臣秉事外內扇動陛下卓然自覽萬機莫不祇肅夫大臣非不忠也然權在下則衆心慢上執之常也陛下既已察之於大臣矣願無

忘於左右左右忠正遠慮未必賢於大臣至於便辟
取容或能工之況實握事要日在目前儻因疲倦之
間有所割制衆臣見其能推移於事即亦因而高之
一有此端私招朋援臧否毀譽必有所興功負賞罰
必有所易直道而上者或壅曲相比附者反達因微
而入緣形而出意所狎信不復猜覺此宜早以經意
也叡不聽及寢疾深念後事乃以武帝子燕王宇為
大將軍夏侯玄曹爽曹肇秦朗等輔政劉放孫資久
典機任玄肇心不平殿中有雞棲樹二人相謂曰此
亦久矣其能復幾放資懼陰圖間之宇性恭良陳誠
固辭叡引放資入卧內問曰燕王正爾為對曰燕王
實自知不堪大任故耳叡曰誰可者時惟爽在側放
資因薦之且請召司馬懿與相參叡從之既而中變
放資復入說又從之放請為手詔叡曰我困篤不能
放上牀執其手強作之遂齎出大言曰有詔免燕王
宇等官不得停省中皆流涕而出遂以爽為大將軍

獻嫌其才弱拜尚書孫禮為長史以佐之時懿在汲
宇以為關中事重宜遣懿還長安事已施行至是復
得手詔前後相違懿疑京師有變乃疾驅入朝與真之子也
集覽或能工之或有者比附比毗至反附黨也附倚也正爾為猶言誠然如此乎在汲句絕汲注見秦莊襄王三年質實
劉放涿郡人曹爽沛國譙人魏之宗室

書法

魏嘗再書立貴嬪某氏為后矣此則直曰立郭夫人何畧之也曷為畧之毛氏之死釁起

郭氏魏主蓋有心矣於是疾革汲汲立焉惟恐不及其蔽亦甚矣哉綱目特異其文所以示譏也

己未二年

魏景初三年吳赤烏二年

春正月魏司馬懿至洛陽與爽受

遺輔政魏主叡卒太子芳立

司馬懿至洛陽入見魏主叡執其手曰吾以後事屬君君與曹爽輔小子死乃可忍吾忍死待君得相見無恨矣乃召二王示懿別指齊王芳曰此是也君諦視之勿誤也又教芳前抱懿項懿頓首流涕於是芳年八歲即日立為太子叡尋卒芳嗣位尊皇后為皇太后爽懿並加侍中都督中外諸軍錄尚書事諸所興作皆以遺詔罷之○明帝沈毅明敏任心而行簡功能屏浮偽行師動衆論決大事謀臣將相咸服之左右小臣官簿性行名蹟所履及其父兄弟一經耳目終不遺忘孫盛曰魏明帝天姿秀出少言好斷諸公受遺輔導者皆以方任處之政自己出優禮大臣雖犯顏極諫無所推戮其君人之量偉矣然不思建德垂風以固維城之基至使大權偏據社稷無衛悲夫

書法

書受遺詔多矣此其獨書受遺何不與魏之有詔也故太子書立不書即位叡立不書芳

何以書正始也則司馬氏廢主之罪著矣賀善贊曰魏明在位十三年書土木之事六首書大營宮室繼書立聽訟觀書治許昌宮書作洛陽宮書復立崇華殿書鑄銅人起土山而又書如許昌書東巡書觀龍煩民極矣又其甚至以小忿而殺其后綱目於是書災三書地震二書疫書涌石書大水各一若魏明者綱目無取焉

二月魏以司馬懿為太傅何晏為尚書

時曹爽司馬懿各領兵三千人更宿殿內爽以懿年位素高常父事之每事咨訪不敢專行初畢軌鄧颺李勝何晏丁謐皆有才名而急於富貴趨事附勢明帝惡其浮華抑而不用曹爽素與親善及輔政驟加引擢以為腹心晏等為爽謀曰重權不可委之於人可白天子轉懿為太傅外以名號尊之內欲令尚書

奏事先來由已得制其輕重爽從之以懿為太傅自
以其弟羲訓等皆為將軍侍從出入禁閤從吏部尚
書盧毓為僕射而以晏代之以颺謚為尚書軌為司
隸晏等依勢用事附會者升進違忤者罷退內外望
風莫敢忤旨傳頡謂義曰何平叔外靜內躁銛巧好
利必先惑子兄弟仁人將遠而朝政廢矣晏等遂因
事免頡官孫禮亮直不集覽銛巧銛思廉反莊質實
撓爽出之為揚州刺史子刀不利筆不銛質實
平叔何晏表字何
晏南陽宛人進孫

夏以蔣琬為大司馬

東曹掾揚戲素簡畧琬與言論戲時不應或謂琬曰
戲慢公矣琬曰人心不同各如其面從後言古人
所誠戲欲贊吾是耶則非其本心欲反吾言則顯吾
之非是以默然耳督農楊敏嘗毀琬曰作事憤憤誠

不及前人主者請推治之琬曰吾實不及前人無可推主者請問憤憤之狀琬曰苟其不如則事不理事不理則憤憤矣後敏坐事繫獄衆猶質實揚戲武陽人憤憤心懼其必死琬心無適莫敏得免重罪

貌亂

冬十月吳遣將軍呂岱屯武昌

岱時年八十躬親王事與陸遜共領荆質實武昌縣州文書同心協規有善相讓南土稱之建興七年荊州注見獻帝建安十二年

吳將周循有罪廢徙廬陵

吳都鄉侯周循將兵千人屯公安以罪廢徙諸葛瑾步騭為之請吳主權曰循年少無功爵以侯將蓋念

公瑾故也而循恃此醜淫無悛且欲苦之使自知耳
以公瑾之子而二君居間苟使能改亦何患乎瑜兄
子偏將軍峻卒全琮請使峻子護領其兵權曰聞護
性行危險用之適為作禍耳孤念公瑾豈有已哉
集覽 公安注見獻帝**質實** 都鄉縣名注見章帝章和
建安十九年
廬陵郡名注見獻帝建
安三年公瑾周瑜表字

十二月魏復以建寅之月為正

庚申三年

魏主曹芳正始元年吳赤烏三年

春以張嶷為越雋太守

初越雋蠻夷數叛殺太守太守寄治安定縣去郡八
百餘里及嶷為守招慰新附誅討彊猾郡界悉平復
還舊**質實** 越雋郡名注見武帝元鼎六年安定縣未
詳處所唯平涼鞏昌慶陽等府及安南國

俱有安定縣未知孰是姑
缺之張嶷巴西南充國人

冬吳饑

辛酉四年

魏正始二年
吳赤烏四年

夏四月吳人攻魏魏擊却之

初吳主權將伐魏零陵太守殷札言曰今天棄曹氏
喪誅累見虎爭之際而幼童莅事陛下宜身自御戎
滌荆揚之地舉彊羸之數使彊者執戟羸者轉運命
益州軍于隴右諸葛瑾朱然指襄陽陸遜朱桓征壽
春大駕入淮陽歷青徐犄角並進民必內應一軍敗
績則三軍離心便當乘勝逐北以定華夏若不悉軍
動衆循前輕舉民疲威消時往力竭非上策也權不
能用四月命全琮魯淮南朱然圍樊諸葛瑾攻柵中
魏將軍王凌與琮戰敗之司馬懿曰柵中民夷十萬
流離無主樊城被攻歷月此危事也請自討之遂督

諸軍救樊吳軍夜遁集覽倚角注見昭烈帝章武二年相中未

楚地音莊加質實零陵郡名注見晉武帝太康元年

反恐即此朱然丹陽人治之姊子朱桓吳郡

人樊城名注見獻帝建安十三年王凌太原祁人淮

陽國名注見周赧王三十七年陳淮南淮水之南注

見延興二年

吳太子登卒

書法卒太子始此終綱目太子書卒者九吳太子

統隋太子昭唐太子寧太子永後唐太子弘

異書薨一唐太子弘書死一唐太子重俊

○蔣琬徙屯涪

琬以諸葛亮數出秦川道險運難卒無成功乃多作舟船欲乘漢沔東下襲魏興上庸會疾動未行朝廷咸以為事有不捷還路甚難帝遣費禕姜維喻指琬言今魏跨帶九州根蒂滋蔓若東西并力首尾掎角

雖未能速如志且當分裂蠶食推其支黨然吳期二三連不克果輒與禕等議以涼州胡塞之要進退有資且羌胡乃心思漢如渴宜以維為刺史若維征行銜制河右臣當帥軍為繼今涪水陸四通惟急是應若東北有虞赴之亦

集覽

魏興注見建興八年西城吳期二三連不克果謂吳

之攻魏屢矣然皆弗果克敵也建興八年攻魏合肥不克十年擊魏廬江不克十一年攻魏新城不克十二年攻魏擊卻之

正誤

吳期二三今按此言與吳今年攻魏不克而遁

質實

上庸縣名注見周赧王十一年涪縣名注見獻帝建安十六年

矣不能果所期也

魏置淮南北屯田廣漕渠

魏欲廣田畜穀於揚豫之間使尚書郎鄧艾行陳項已東至壽春艾以為太祖破黃巾因為屯田積穀許都以制四方今三隅已定事在淮南每大軍出征運兵過半功費巨億陳蔡之間上下田良可省許昌左右稻田并水東下令淮北屯二萬人淮南三萬人什二分休常有四萬人且田且守益開河渠以增灌溉通漕運計除衆費歲完五百萬斛六七年間可積三千萬斛於淮上此則十萬之衆五年食也以此乘吳無不克矣司馬懿善之是歲始開廣漕渠每東南有事大軍泛舟達于江淮資食有儲而無水害

覽 陳項陳伏羲所都今陳州宛丘縣是項漢汝南郡邑今陳州項城縣是什二分休十人之中以二人分番休息乘吳左

質實 陳縣名注見周赧王三十七年項縣名注見延熙十八年

傳杜預注乘伐也

蔡縣名注見秦
二世二年前上蔡

管寧卒於魏

寧名行高潔人望之者邈然若不可及即之熙熙和
易能因事導人於善人皆化服年八十四卒天下知
與不知間之
無不嗟嘆

書法

布衣也何以卒錄賢也終綱目布衣書卒二
黃憲管寧皆錄賢也然則其書卒於魏何不

使魏得臣之也是故孟軻管寧亦天下之善士也書卒於魏
而不書鄒孟軻管寧亦天下之善士也書卒於魏
而不書
魏管寧

壬戌五年

魏正始三年
吳赤烏五年

春正月中監軍姜維自漢中徙屯

涪○吳立子和為太子霸為魯王

霸和母弟也吳主權愛之與和無異其傳是儀諫曰魯王兼資文武宜出鎮四方為國藩輔且使二宮有所降殺以正上下
集覽
降殺殺所戒反降下殺削也

癸亥六年

魏正始四年吳赤烏六年

夏五月朔日食既

書法

食既大變也自是陳祗黃皓用事而漢亡矣故謹書之終綱目書日食三百六十七而食

既者十二無不有大應者也詳惠帝七年

○冬十月遣前監軍王平督漢中質實

漢中郡名注見周赧王四年

○十一月以費禕為大將軍錄尚書事○魏揚豫都督

王昶徙屯新野

昶言地有常險守無常執今屯宛去襄陽三百餘里有急不足相赴遂徙屯新野質實宛縣名注

見周赧王十七年襄陽縣名注見獻帝建安十二年新野縣名注見平帝元始四年

甲子七年

魏正始五年吳赤烏七年

春正月吳以陸遜為丞相○三月

魏曹爽寇漢中閏月費禕督諸軍救之

魏征西將軍夏侯玄爽姑子也辟李勝為長史勝及鄧颺欲爽立威名於天下勸使伐蜀司馬懿止之不得三月爽至長安發卒十餘萬與玄自駱谷入漢中漢中守兵不滿三萬諸將皆恐欲守城不出以待涪兵王平曰此去涪垂千里賊若得關便為深禍遂遣護軍劉敏據興勢多張旗幟彌亘百餘里閏月帝遣

費禕救漢中將行光祿大夫來敏詣禕別求共圍碁
時羽檄交至人馬擐甲嚴駕已訖禕與對戲了無倦
色敏曰向聊觀試君耳

集覽

縣有駝谷關名漢中郡興勢

谷北口曰駝谷洋州志駝谷在真符縣屈回八十里
凡八十四盤垂千里垂猶言將及興勢山名三國漢
置關於此指掌圖以為在興元成固縣寰宇記云在
洋州興道縣北四十三里今郡城所枕形如一盆外
險而內有大谷為盤道上數里方及四門擐甲擐
音患貫也嚴駕嚴莊也莊治行李也具車馬曰駕
正
誤嚴駕今按漢書**質實**一統志云夏侯玄沛國人駝
裝嚴字作裝**質實**谷關名在西安府藍屋縣西
南一百二十里劉敏零陵人優之孫興勢山名在漢
中府洋縣西北二十三里山形如盆外甚險乃盤道
以上漢時諸葛亮嘗戍兵
於此處來敏汝寧義陽人

夏四月朔日食○五月魏軍退走

魏兵距興執不得進關中及氐羌轉輸不能供牛畜多死民夷號泣道路司馬懿與夏侯玄書曰春秋責大德重今興執至險蜀已先據之若進不獲戰退見迫絕覆軍必矣將何以任其責玄懼言於爽遂引軍還費禕進據三嶺以截爽爽爭險苦戰僅乃得過失亡甚衆關中為之虛耗

冬以費禕兼益州刺史董允守尚書令

蔣琬以病固讓州職於禕時國務煩猥禕識悟過人為尚書令省讀文書舉目究意終亦不忘常以朝晡聽事其間接納賓客飲食博戲盡人之懽而事無廢闕及允代禕始欲數之旬日之中已多愆滯乃歎曰人才相遠如此非吾所及也質實益州注見晉武帝泰始五年

乙丑

八年

魏正始六年
吳赤烏八年

春吳殺其太子太傅吾粲

吳太子和與魯王同宮禮秩如一群臣多以為言吳主權乃命分宮別僚二子由是有隙全琮遣其子寄事魯王陸遜謂曰子弟苟有才不憂不用私出以要榮利終取禍耳聞二宮執敵此古人之深忌也寄果阿附交構遜又與書曰卿不師日碑而宿留阿寄終為門戶禍矣琮不納霸曲意交結名士將軍朱績以膽力稱霸自詣之欲與結好績辭不受於是仇黨疑貳舉國中分權長女適全琮少女適朱據全公主與太子母王夫人有隙權寢疾遣太子禱桓王廟太子妃叔父張休居近廟邀太子過所居公主因言太子不至廟中專就妃家計議而王夫人見上寢疾有喜色權由是發怒夫人以憂死太子寵日衰霸黨楊竺全寄從而毀之權惑焉陸遜諫曰正統藩臣當使寵秋有差則彼此得所上下獲安矣書三四上辭情危

切權不悅太常顧譚遜之甥也上疏曰有國家者必
明嫡庶之端異尊卑之禮使高下有差等級踰邈則
骨肉之恩全覬覦之望絕矣臣之所陳非有所偏誠
欲以安太子而便魯王也由是霸惡譚全琮亦惡之
相與譖之吳主徙譚於交州太子太傅吾粲請使魯
王鎮夏口出楊竺等不得在京師又數以消息語陸
遜霸竺譖之

集覽

別僚分別二宮臣僚令各有差等
不師日碑漢武時金日碑有子為

吳主怒誅粲
帝弄兒壯大不謹自殿下與宮人戲日碑惡其淫亂
殺之此事可法而不師之宿留阿寄阿寄猶魯肅呼
呂蒙為阿蒙之類謂全寄宿留於魯
王宮也宿留注見和帝永元十五年
正誤宿留阿寄
宿留猶遲疑不決之意蓋全琮遣其子寄事魯王陸
遜嘗戒之不納故謂全琮不法金日碑殺子之明斷
而遲疑不決縱令
質實霸魯王名也桓王廟按吳志
其子阿附魯王也
孫策死孫權稱尊號追諡策

為長沙桓王覬覦有望欲得之貌左傳桓二年師服曰民服事其上而下無覬覦夏口注見獻帝建安十三年

吳丞相陸遜卒

吳主權以魯王霸楊竺之譖數遣使責問遜遜憤恚而卒其子抗代領其衆送葬東還權以竺所白遜二

十事問抗抗事事條答權意乃稍解

秋八月皇太后吳氏崩考證

下當補書葬穆皇后○謹按凡例曰凡正統之后合

葬不地註云如漢光武昭烈之類陳壽志云先主穆皇后延熙八年合葬惠陵○謹按綱目於漢曰即皇帝位者三始書漢王中書蕭王終書漢中王以著創業中興紹承正統之例也朱子嘗曰溫公以魏為主其理都錯

熹所作綱目以蜀為主見于語畧如此而大經大法已
粲然可見今所存諸刊本自章武至延熙二十餘年間
得其脫誤者六七故當補正表章武於末年以定父子
之倫也葬惠陵以正昭烈之終也書帝禪以尊正統也
合葬吳太后特葬張皇后以正二后之終也加貴人於
立張后之上以著其非正嫡也昭文生于大賢既沒之
後幸其書存得求義例究明君臣父子夫婦
之大綱庶幾有補於垂世立教之微意也歟○冬十一

月大司馬蔣琬卒○十二月尚書令董允卒以宦者黃
皓為中常侍

董允秉心公亮獻替盡忠帝甚嚴憚之宦人黃皓便
辟佞慧有寵允數責之皓畏允不敢為非終允之世
位不過黃門丞費禕以遜曹郎陳祗代允為侍中祗
矜厲有威容多技藝挾智數禕以為賢越次用之祗

與皓相表裏皓始預政遷中常侍操弄威柄終以覆國自祇有寵而帝追怨久日深由祇阿意迎合而皓浸潤構間故也○時帝數出遊觀增廣聲樂太子家令譙周諫曰昔王莽之敗豪傑並起以爭神器然莫不快情恣欲急於為善世祖初入河北馮異勸之曰當行人所不能為者遂理冤獄崇節儉北州歌嘆聲布四遠於是鄧禹自南陽追之吳漢寇恂舉兵助之其餘望風慕德輿病齋棺襁負而至不可勝數故能以弱為疆而成帝業在洛陽嘗欲小出鉞期進諫即時還車及潁川盜起寇恂請身往臨賊聞言即行故非急務欲小出不敢至於急務欲自安不為帝者之欲善也如此傳曰百姓不徒附誠以德先之也今漢遭厄運天下三分雄哲之士思望之時也臣願陛下復行人所不能為者以副人望且承事宗廟所以率民尊上也今四時之祀不臨而池苑之觀仍出臣所不安也夫憂責在身者不暇盡樂願省減樂官後宮

凡所增造以成

集覽

銚期姓名

質實

譙周巴西人神
器注見光武建

先帝之志不聽
武六年銚期
潁川鄉人

書法

中常侍以宦者為之宜矣則其書何著亂本
也是故董允卒而黃皓用是年李絳出而承

璿入唐憲宗元和九年綱目每聯書
之所以著君子小人之不兩立也

發明

東漢亡於宦者殷鑒不遠後帝昏庸親尋覆
轍亂亡之形著矣綱目上書蔣琬董允卒下

書以宦者為中常侍則見二臣公正猶足以尼小
人之惡一旦正人告殞儉佞遽形然後知法家拂
士其所繫也如此此
又綱目言外之意

丙寅九年

魏正始七年
吳赤烏九年

春魏擊高句驪克丸都

幽州刺史母丘儉以高句驪王位宮數為侵叛督諸
軍討之位宮敗走儉遂屠九都初句驪之臣得來數
諫位宮不從退而歎曰立見此地將生蓬蒿遂不食
而死儉令諸軍不壞其墓全其妻子遣將追位宮至
肅慎氏南界刻集覽得來姓名也肅慎氏虞舜本紀
石紀功而還北山戎發息慎鄭玄曰息慎或
謂之肅慎東北夷也括地志云今靺鞨古肅慎也其
國在不咸山北西南去夫餘千五百里與北沃沮相
接在京兆東北質實一統志云九都山名在朝鮮國
八千四百里城東北漢時高句驪王伊夷模
都於此至晉為慕容皝所破母丘儉聞喜
人肅慎氏注見晉成帝咸康六年挹婁

秋九月吳以步騭為丞相○吳分荊州為二部

以呂岱督右部自武昌以西至蒲圻諸葛恪督左部鎮武昌

集覽

蒲圻漢江夏有蒲圻湖多蒲草

吳大帝立縣於湖側因名焉今鄂州蒲圻縣是盛質
弘之荊州記云蒲圻縣沿江百里南岸地名赤壁

實

一統志云蒲圻本漢沙羨縣之地名孫吳時分武昌為兩部自武昌至蒲圻為右部始置蒲圻縣以

湖畔多蒲故名晉屬長沙郡劉宋屬江夏郡梁屬上
雋郡隋屬鄂州唐宋元俱仍其舊國朝因之改屬武

昌府

赦

大司農孟光於衆中責費禕曰赦者偏枯之物非明
世所宜有也必不得已乃可權而行之今有何急而
數施非常之恩以惠姦宄乎禕顧謝蹶蹶而已初丞
相亮時有言公惜赦者亮荅曰治世以大德不以小
惠故匡衡吳漢不願為赦先帝亦言吾周旋陳元方
鄭康成間每見啟告治亂之道悉矣曾不語赦也若

劉景升父子歲歲赦宥何益於治乎陳壽曰諸葛亮為政軍旅數興而赦不妄下不亦卓乎
蹇蹇恭敬不寧之貌陳元方陳紀表字穎川許人鄭康成鄭玄表字北海密人劉景升劉表表字山陽高平人

吳罷大錢○以姜維為衛將軍與費禕並錄尚書事

丁卯十年魏正始八年春二月日食

時魏主芳褻近群小遊宴後園何晏上言自今遊豫宜從大臣詢謀政事講論經義不聽而晏等明附曹爽亦好變改法度太尉蔣濟上疏曰惟命世大才乃能張其綱維以垂于後下吏改易無益於治適足傷民宜使文武之臣各守其職則和氣可致也

吳作太初宮

吳主權詔徙武昌宮材瓦脩建業宮有司奏故宮歲久恐不堪用宜下所在通伐權曰大禹以卑宮為美今軍事未已所在賦歛若更通伐集覽宜下所在通恐妨農桑武昌材瓦自可用也集覽伐言當行下所屬一例科取也本作質實一統志云太初宮在應宜下所在通更伐致質實天府上元縣治東北五里臺城內本吳長沙桓王策之故府大帝自京口遷建業居之其後起新宮於太初東制度尤廣名曰昭明宮

書法

書作宮何美也作宮之為譏多矣此則曷為以美書於是因武昌材瓦恐妨農桑可謂有

邨民之心者故書美之終綱目書作宮殿五十六其以美書者鮮矣

魏遷其太后於永寧宮

曹爽用何晏等謀遷太后擅朝政多樹親黨司馬懿不能禁遂稱疾不與政事

書法

遷之者曹爽也則其不書曹爽何據安帝延光四年閭顯及靈帝建寧元年曹節皆書主

名均其罪於魏之臣子也於是爽專朝政擅遷太后在朝大臣雖司馬懿等莫之禁而聽其所為書

曰魏遷分罪也

戊辰十一年

魏正始九年吳赤烏十一年

夏四月魏以徐邈為司空不

受

魏以光祿大夫徐邈為司空邈嘆曰三公論道之官無其人則闕豈可以老病泰之哉遂固辭不受質

實

徐邈
薊人

五月費禕出屯漢中質實

漢中郡名注見
周赧王四年

自蔣琬及禕雖身居於外慶賞威刑皆遙先諮
斷然後乃行禕雅性謙素當國功名畧與琬比

已已
十二年

魏嘉平元年吳
赤烏十二年

春正月魏司馬懿殺曹爽及

何晏等夷其族

曹爽驕奢無度飲食衣服擬於乘輿又私取先帝才
人以為伎樂作窟室綺疏四周與何晏等縱酒其中
弟羲泣諫不聽又兄弟數俱出遊司農桓範謂曰總
萬機典禁兵不宜竝出若有閉城門誰復內人者爽
曰誰敢爾邪初清河平原爭界八年不能決冀州刺
史孫禮請天府所藏列祖封平原時圖以決之爽信

清河之訴云圖不可用禮上疏自辨辭頗剛切爽大怒劾禮怨望結刑五歲久之復為并州往見司馬懿有忿色而無言懿曰卿得并州少邪恚理分界失分乎禮曰禮雖不德豈以是為意邪本謂明公匡輔魏室以報明帝之託今社稷將危天下兇克此所以不悅也因涕泣橫流懿曰且止忍不可忍後李勝出刺荆州過辭懿懿令兩婢侍持衣衣落指口言渴婢進粥懿不持杯而飲粥流霑胸勝曰衆謂明公舊風發動何意乃耳懿使聲氣纔屬言年老枕疾死在旦夕并州近蕃好為之備且以子師昭為託勝曰還忝本州非并州也懿復錯亂其辭曰君方到并州勝曰當忝荊州懿曰年老意荒不解君言今為本州好建功勲勝退告爽曰司馬公尸居餘氣形神已離不足慮矣故爽等不復設備是月魏主芳謁高平陵爽與弟羲訓彥皆從懿與師昭謀以皇太后令閉諸城門勒兵據武庫召司徒高柔假節行大將軍事據爽營太

僕王觀行中領軍事據義營奏曰大將軍與背棄顧命敗亂國典僭擬專權盡據禁兵群官要職皆置所親殿中宿衛易以私人伺察至尊離間兩宮天下洵人懷危懼此非先帝詔陛下及臣升御牀之本意也太尉臣濟等皆以與有無君之心兄弟不宜典軍宿衛奏永寧宮皇太后令臣如奏施行臣輒勅主者罷與義訓吏兵以侯就第敢有稽留車駕便以軍法從事臣輒力疾將兵屯洛水浮橋伺察非常與得奏迫窘不知所為懿使與所親信說與宜早自歸罪唯免官而已懿以太后令召桓範範欲應命其子曰車駕在外不如南出範乃出懿謂蔣濟曰智囊往矣濟曰駕馬戀棧豆必不能用也範勸與以天子詣許昌發四方兵自輔與疑未決範謂義曰此事昭然卿用讀書何為今卿門戶求貧賤復可得乎且匹夫質一詣人尚欲望活卿與天子相隨令於天下誰敢不應今詣許昌不過中宿所憂穀食而大司農印章在我身

義兄弟不從自甲夜至五鼓爽乃投刀於地曰我亦不失作富家翁範哭曰曹子丹佳人生汝兄弟犢耳何圖今日坐汝族滅也爽乃通懿奏請下詔免已官奉駕還宮爽兄弟歸家懿發吏卒圍守之有司奏黃門張當私以所擇才人與爽疑有姦收付廷尉考實辭云爽與何晏鄧颺丁謐畢軌李勝等謀逆於是收爽義等并桓範張當俱夷三族先是宗室曹罔上書曰古者必建同姓以明親親必樹異姓以明賢賢親疎並用故能保其社稷今州郡牧守皆跨有千里兼軍武之任或比國數人或兄弟並據而宗室子弟王空虛之地君不使之民曾無一人間廁其間與相維制非所以彊幹弱枝備萬一之虞也語曰百足之蟲至死不僵以其扶之者衆也此言雖小可以譬大罔欲以感寤曹爽爽不能用及懿閉門爽司馬魯芝聞變將營騎斫津門出赴爽及爽解印綬主簿楊綜止之曰公扶主握權捨此以至東市乎有司奏收芝

綜懿曰彼各為其主也宥之芝之出也呼參軍辛敞欲與俱敞謀於其姊憲英曰天子在外太傅開城門人云將不利國家於事可得爾乎憲英曰以吾度之太傅誅曹爽耳然則事就乎曰得無殆就爽才非太傅偶也然則可以無出乎曰職守人之大義也凡人在難猶或卹之執鞭而棄其事不祥莫大焉且為人任為人死親昵之職也從衆而已敞遂出事定之後嘆曰吾不謀於姊幾不獲於義○先是爽辟王沈羊祜沈勸祜應命祜曰委質事人復何容易沈遂行及爽敗沈以故吏免謂祜曰吾不忘卿前語祜曰此非始慮所及也○爽從弟文叔妻夏侯令女早寡無子其父欲嫁之令女截耳自誓居常依爽與誅其家上書絕昏強迎以歸復將嫁之令女又斷其鼻其家驚惋謂之曰人生世間如輕塵棲弱草何至自苦乃爾且夫家夷滅已盡守此欲誰為哉令女曰吾聞仁者不以盛衰改節義者不以存亡易心曹氏前盛時尚

欲保終況今衰亡何忍棄之此禽獸之行吾豈為乎
懿聞而賢之聽使乞子字養為曹氏後○何晏等方
用事自以為一時才傑人莫能及嘗為名士品目曰
唯深也故能通天下之志夏侯泰初是也唯幾也故
能成天下之務司馬子元是也惟神也故不疾而速
不行而至吾聞其語未見其人蓋以自況也晏間平
原管輅明術數請與論易鄧颺在座謂輅曰君自謂
善易而語不及易中詞義何也輅曰夫善易者不言
易也晏笑而贊之曰可謂要言不煩因謂輅曰試為
作一卦當至三公不又問連夢青蠅數十來集鼻上
何也輅曰元凱輔舜周公佐周皆以和惠謙恭享有
多福今君侯位尊執重而懷德者鮮畏威者衆殆非
小心求福之道願君侯哀多益寡非禮不履然後三
公可至青蠅可驅也颺曰此老生之常談輅曰老生
者見不生常譚者見不譚輅舅間之責其言太切輅
曰與死人語何所畏邪舅怒以為狂選部郎劉陶少

有口辯鄧颺之徒以伊呂稱之陶嘗謂傳玄曰智者
於羣愚如弄一丸於掌中而仲尼不能得天下何以
為聖玄曰天下之變無常也今見卿窮矣至是陶退
居里舍乃謝其言之過輅之舅亦謂輅曰爾前何以
知何鄧之敗輅曰鄧之行步筋不束骨脉不制肉起
立傾倚若無手足此為鬼躁何之視候魂不守宅血
不華色精爽煙浮容若槁木此為鬼幽二者皆非遐
福之象也晏性自喜粉白不去手行步顧影尤好老
莊書與夏侯玄荀粲王弼之徒競為清談祖尚虛無
謂六經為聖人之糟粕由是天下士大夫慕效之遂
成風流不

集覽

作窟室綺疏四周窟室掘地為室也
綺文繒也綺疏四周謂疏通其周匝

為牕而以綺蒙之飲酒其間也引左傳襄三十年鄭
伯有耆酒為窟室而夜飲酒擊鐘焉朝至未已朝者
曰公焉在其人曰吾公在壑谷注壑谷窟室也天下
兇兇音凶又上聲左傳曹人兇懼徐氏曰象齒而

懼也兇通作句漢高本紀天下句句注喧擾之意懿
使聲氣纔屬作聲使氣似欲絕而僅纔聯屬之狀司
馬懿故作此態以示衰老無用尸居猶言行尸走肉
也謂懿如死尸之居世無能為矣天下洵洵音凶
又上聲此言天下喧擾如水勢洶湧故人懷危懼也
楚辭水聲洶洶力疾注見晉穆帝永和五年棧豆棧
仕限反馬阜也豆所以飼馬大司農主錢穀金帛邊
郡調度皆為報給甲夜初更也子丹佳人曹真字子
丹爽之父也佳好也佳人猶言佳士李延年歌曰北
方有佳人絕代而特立彊幹弱枝京師為幹四方為
枝西都賦曰彊幹弱枝隆上都而觀萬國東市刑人
之所也容易更易也謂豈容更事他人秦初夏侯
玄表字子元司馬師表字是為晉景帝性自喜粉白
不去手三國魏曹爽傳後注何晏性自喜動靜粉白
不去手胡致堂曰晏以
貌自喜粉白不去手

正誤

委質事人復何容易今
按易去聲言不可輕易

也漢書東方朔傳談何質實一統志云高平陵在河南府孟

容易楊敞傳事何容易

帝之墓也在河南府孟

津縣舊河清城界洛水注見光武建武三年許昌縣

名注見獻帝建安元年王觀東郡人魯芝鄙人辛敞

潁川陽翟人毗之子王沈晉陽人機之子羊祜泰山

南城人續之孫平原縣名注見光武建武五年何晏

宛人進之孫夏侯玄沛國人尚之子荀粲潁川潁

陰人王弼山陽人傳玄靈州人徙居泥陽幹之子

書法

爽罪甚矣其書殺何惡懿也司馬氏之威始

也

發明

曹爽受遺輔政身為大將軍又加侍中都督

中外諸軍錄尚書事而司馬懿殺之如斃孤

豚綱目亦削其官而不書何哉驕奢無度僭擬乘

與多置親黨專擅朝權縱酒宣淫信用浮薄此豈

輔政大臣所當為耶及事變已形又不能用桓範之謀挾其主以自免乃欲不失作富家翁蠢繆若此是特孤豚之不若耳何足貴哉然爽既有罪胡不正其伏誅之名而以懿殺為文蓋懿欺孤弱寡已有無君之心特因事而發非必忠於佐魏故其書法如此先儒謂春秋之於王道猶輕重之權臣謂綱目之於子奪亦輕重之權衡也夫豈厚於懿而薄於爽哉

魏以司馬懿為丞相加九錫不受考異

提要作魏司馬懿自為丞相加

九錫復辭不受按篡賊例注曰董卓曹操等自其得政遷官建國皆以自為自立書之則此當從提要為是

考證

當作魏司馬懿自為丞相加九錫復辭不受○謹按古者國家大臣受遺輔政安危之所繫焉漢武

帝命霍光昭烈命孔明君能知臣臣能盡忠可謂兩得矣以唐太宗賢明猶不知李勣致有武氏之亂况替國

嗣主安能知其臣乎當曹魏時司馬懿雖有無君之心而未得專國之權明帝屬以後事者是授以國命也因而廢弒三主卒篡其國皆由卧內一言以召之凡例曰凡書篡國隨事異文而尤謹其始今故追原事義推本以凡例當於司馬懿為丞相加九錫特以自為書之然亦不足以著其罪也

書法

書以何命自上出也不受則懿亦可謂稍知節矣綱目書九錫十四詳平帝元始五年書

加其九錫者一王莽書以其加九錫而不受者二懿朱全忠書自加者九曹操趙王倫桓玄蕭道成蕭衍陳霸先楊堅李淵王世充書自加九錫而復辭者二司馬昭劉裕然全忠以不滿而不受又非懿之比矣

○魏護軍夏侯霸來奔

霸為曹爽所厚以父淵死於蜀常切齒有報仇之志
為征蜀護軍統屬征西征西將軍夏侯玄霸之從子
爽外弟也至是司馬懿召玄詣京師而以郭淮代之
霸素與淮不協恐禍及遂來奔姜維問之曰懿既得
政當復有征伐之志不霸曰彼方營立家門未遑外
事有鍾士季者其人雖少若管朝政吳蜀之憂也士
季者鍾繇之子

集覽

鍾繇姓名質實

夏侯霸沛國人

尚書郎會也

川長
社人

三月吳大司馬朱然卒

然氣候分明內行脩潔終日欽欽若在戰場臨急膽
定過絕於人雖世無事每朝夕嚴鼓兵在營者咸行
裝就隊以此玩敵使不知所備故出輒
有功為大司馬病卒吳主權為之哀慟

集覽

嚴而擊

鼓

質實

朱然丹陽人治之子

秋姜維伐魏雍州不克

維攻魏雍州依麴山築二城使句安李韶守之聚羌胡質任侵逼諸郡魏郭淮使刺史陳泰進兵圍之斷其運道及城外流水將士窘困分糧聚雪以引日月維引軍救之出自牛頭山與泰相對泰勅諸軍各堅壘勿與戰遣使白淮使趣牛頭截其還路

集覽

句安姓名列

從之進軍洮水維懼遁走安等降魏

句音鉤質任國弱懼彼侵伐令子及貴臣往為質此

質如字讀任汝鵠反義與質同又質詳注見周顯王

四十一年洮水洮音滔水經注洮水出隴西臨洮

縣北至枹罕東入河輿地記洮水源出西傾山洮質

實一統志云陳泰潁川人羣之子牛頭山在漢中府褒城縣西北二十五里以形似名洮水在臨洮府

城西南吐谷渾界一名恒水源出西傾山流經府界雍州注見唐玄宗開元十一年京兆

冬十二月魏即拜王淩為太尉考異

提要作魏即拜揚州都督王淩為太

尉

初淩以將軍假節督揚州西其甥令狐愚為兗州刺史屯平阿甥竝典重兵專淮南之任陰謀以魏主制於彊臣楚王彪有智勇欲共立之迎都許昌愚遣其將與楚王相間淩子廣諫曰凡舉大事應本人情曹爽驕奢平叔虛華丁畢鄧桓專競於世所存雖高而事不下接變易朝典民莫之從故同日斬戮名士減半而百姓不哀失民故也今司馬懿情雖難量事未有逆而擢用賢能脩先朝政令副衆心所求爽之所以為惡者彼莫不改夙夜匪懈以恤民為先父集子兄弟竝握兵要未易亡也淩不從會患病卒

覽

令狐複姓注見唐昭宗天復元年平叔何晏表字丁畢鄧桓四人也丁謚畢軌鄧颺桓範

質實

平阿縣名
未詳沿革

魏光祿大夫徐邈卒

盧欽曰徐公志高行潔才博氣猛其施之也高而不狃潔而不介博而守約猛而能寬或問欽徐公當武帝之時人以爲通自爲涼州刺史還人以爲介何也欽曰往者毛孝先崔季珪用事貴清素之士時皆變易車服以求名而徐公不改其常故人以爲通比來天下奢靡相效而徐公雅尚自若故前日之通乃今日之介也是世人無狃狃守節無爲也論語常而徐公有常耳

集覽

狃者進取狃者有所不爲

不介介耿介也易繫辭憂悔吝者存乎介孟子不質以三公易其介孝先毛玠表字季珪崔琰表字

實

盧欽涿郡涿人
鯀之長子

庚午十三年

魏嘉平二年吳赤烏十三年

秋吳廢其太子和殺魯王霸

及將軍朱據冬十一月立子亮為太子

初潘夫人有寵於吳主權生少子亮權愛之全公主既與太子和有隙欲豫自結數稱亮美權以魯王霸結朋黨以害其兄心亦惡之謂侍中孫峻曰子弟不睦將有袁氏之敗為天下笑若使一人立者安得不亂乎遂有廢和立亮之意然猶沉吟歷年至是乃幽太子和將軍朱據諫曰太子國之本根加以雅性仁孝天下歸心昔晉獻用驪姬而申生不存漢武信江充而戾太子冤死臣竊懼太子不堪其憂雖立思子之官無及矣不聽據與尚書僕射屈晃率諸將吏泥頭自縛連日詣闕請和而無難督陳正及五營督陳

象各上書切諫吳主大怒族誅正象牽據晃入殿據
晃猶叩頭流血辭氣不撓權杖之一百遂廢和為庶
人徙故鄆賜霸死殺楊竺全寄等

集覽

袁氏之敗袁
紹三子譚熙

據尋亦賜死明年立潘氏為皇后
尚譚當為嗣紹乃以繼兄之後紹卒眾以遺命立其
幼子尚後兄弟相攻為曹操所敗立思子之宮漢武
帝因思戾太子而立望思臺泥頭以物蒙頭如刑人
之狀無難督官號也故鄆地理志秦置鄆郡漢改丹
陽郡漢書豫章注索隱曰章郡後改曰故章或稱豫
章為衍字也括地志云秦之鄆郡今湖州長興縣西
南八十里
故鄆城是正誤
泥頭今按謂以泥塗其頭也文選范
十四卷泥質實
孫峻富春人吳之宗室屈晃天台人
首倣此
晉獻用驪姬而申生不存注見高帝
十二年漢武信江充而戾太子冤死注見武帝征和
二年思子宮注見武帝征和三年一統志云故鄆秦

之縣名始皇滅楚置之為鄣郡治所漢屬丹陽郡王莽改曰候望東漢復為故鄣縣晉屬吳興郡後廢之故城在湖州府長興縣西南一百二十里

發明

和書廢霸書殺據書及且不去其爵是皆無罪之人也夫衽席之私非惟昏主惑之雖明

君亦未必能免忠直之言非惟昏主違之雖明君亦未必能聽觀吳主權之廢嫡立庶朱據等忠言苦諫不惟不能聽又從而殺之權雖偏霸然亦自以為一世人豪晚節末路昏繆乃爾溺其所可愛忘其所可戒詳書于冊其為後世鑒豈不深切著明也哉

吳作堂邑塗塘集覽

堂邑地理志臨淮有堂邑案臨淮今泗州是塗塘塗本作涂涂水出

堂邑晉伐吳遣琅邪王出涂中即此地

遣兵十萬作
之以淹北道

書法

作塘必書重民力也書作塘始此終綱目書
作塘四吳塗塘浦里塘梁鵞淮塘吳越捍海

石塘

十二月魏擊吳戰於江陵大破之

魏王昶言孫權流放良臣嫡庶分爭可乘釁擊之司
馬懿遣新城太守陳泰襲巫秭歸荊州刺史王基向
夷陵昶向江陵昶引竹絙為橋渡水擊吳軍吳將施
績夜遁入江陵昶欲引致平地與戰乃先遣五軍案
大道發還使吳望見而喜又以所獲鎧馬甲首環城
以怒之而設伏兵以待之績果來追昶與戰大破之
斬其二將王基陳泰集覽巫注見周赧王十六年秭
亦破吳兵降數千口歸注見和帝永元十二年

竹絙為橋絙居登反大索也以竹索為橋駕虛而渡
名曰繩橋又名竿橋竿橋注見晉穆帝永和三年案
大道案依大略而還歸鎧馬甲首皆魏軍先所戰獲
者鎧即甲也首謂所斬人頭韻會鎧字下引廣雅鎗
甲介鎧也周禮司甲注疏云古
用皮為之甲今用金為之鎧

辛未十四年

魏嘉平三年
吳大元元年

夏四月魏司馬懿殺王淩及楚

王曹彪遂置諸王公於鄴

淩遣將軍楊弘以廢立事告兖州刺史黃華華弘連
名以白司馬懿懿將中軍乘水道討淩先下赦赦淩
罪又為書諭淩已而大軍掩至百尺淩執窮面縛水
次懿解其縛送詣京師道飲藥死懿至洛陽窮治其
事諸相連者悉夷三族發淩愚冢剖棺暴尸賜楚王
彪死盡錄諸王公置鄴使有司察之不得與人交關

初愚為白衣時常有高志衆謂必興令狐氏族父邵獨以為愚性倜儻不脩德而願大必滅我宗愚甚不平及愚仕進有名稱從容謂邵曰先時聞大人謂愚為不繼今竟云何邪邵熟視而不荅私謂妻子曰公治性度猶如故也不知我當坐之不邪必逮汝曹矣邵没十餘年而愚滅族初愚以別駕單固治中楊康為腹心及愚卒康露其陰事愚由是敗懿至壽春以問固固曰無有遂收繫獄使康詰之固辭窮乃罵曰老傭既負使君又滅我族顧汝當活耶康初自冀封侯後以辭頗參錯亦并斬之固又罵之曰若死者有知汝何面目

集覽

百尺村名今蠡州博野縣有大百尺村屬河間倜儻卓異也不羈之

士倜儻歷反公治令狐愚字單固單姓注見光武建武十九年治中官名也治平聲

正誤

百尺今按

王淩在淮南司馬懿擊之掩至百尺何為至博野邪水經注沙水東南過陳縣又東南流注于潁謂之交

口水次有大堰即古百尺
堰杜佑曰在陳留宛丘縣

書法

凌謀立彪逆也不書書殺何寇懿也而因置
諸王公於鄴甚矣故以遂書之彪必書曹殊

之於漢
宗也

發明

王凌以其君制於強臣之手雖舉大事其名
似正然綱目不書其官又不予以討懿者外

其君而欲立彪且又面縛出降故也懿自殺
後魏國已在其掌握今又殺彪而盡置諸曹於
其脇制之威又甚於操之所為矣自丕篡漢至
是纔三十載天道好還如此豈不昭昭也哉

秋八月魏太傅司馬懿卒以其子師為撫軍大將軍錄

尚書事考異

提要其上無以字為上有自字據十八
年書師弟昭自為大將軍合從提要

魏分匈奴左部為二國

初南匈奴自謂其先本漢室之甥因冒姓劉氏魏太祖留單于呼廚泉於鄴分其衆為五部居并州境內左賢王豹為左部帥部族最強城陽太守鄧艾上言單于在內羌夷失統合散無主今單于之尊日疏而外土之威日重不可不深備也間劉豹部有叛胡可因此割為二國以分其勢去卑功顯前朝宜加其子顯號使居鴈門離國弱寇追錄舊勲御邊長計也又陳羌胡與民同處宜以漸出之使居民表以崇廉恥之教塞姦宄之路

集覽 呼廚泉單于名去卑右賢王司馬師皆從之

質實 城陽郡名注見高帝四年鄧艾棘陽人也使居民表使羌

胡居於編民之外

冬十一月吳以諸葛恪為太子太傅總統國事

吳立節中郎將陸抗自柴桑屯所詣建業治病病差
當還吳主權涕泣與別謂曰吾前聽用讒言與汝父
大義不篤以此負汝前後所問一切焚之莫令人見
也時權頗寤太子和之無罪十一月祀南郊還得風
疾欲召和還全公主及侍中孫峻中書令孫弘固爭
之乃止權以太子亮幼議所付託峻薦恪可付大事
權嫌其剛狠自用峻曰朝臣才無及恪者乃召之恪
將行呂岱戒之曰世方多難子每事必十思恪曰昔
季文子三思而後行夫子曰再斯可矣今君令恪十
思明恪之劣也岱無以答時咸謂之失言恪至建業
見吳主於卧内受詔牀下以大將軍領太子太傅孫
弘領少傅有司諸務一統於恪惟殺生大事乃以間
虞喜曰夫託以天下至重也以人臣行主威至難也
兼二至管萬機能勝之者鮮矣元遜若因十思之義
廣諮當世之務聞善速於雷動從諫急於風移豈得
隕首殿堂死於凶豎之刃世人奇其英辨可觀而哂

呂侯無對為陋是樂春藻之繁華而忘秋實之甘口也昔來敏與費禕對恭意無厭倦必能辦賊然况長寧以為君子臨事而懼好謀而成蜀為叢爾之國方向大敵何可矜已有餘晏然無戚斯禕性寬簡不防細微卒為降人所害豈非兆見於彼而集覽死於凶禍成於此哉二事體同皆足為世鑒也侍中孫峻構恪於吳王伏兵殺之事在後來敏與費禕對恭事在七年卒為降人所害費禕後為魏降將郭循所殺正誤况長寧今按况姓質實紫桑縣名注見獻帝事在後年長寧名蜀人也

建安十三年元遜諸葛恪表字

費禕北屯漢壽以陳祗守尚書令質實

漢壽縣名注見延熙十六年

壬十五年

魏嘉平四年吳主孫亮建興元年

春正月魏以司馬師為大

將軍考異

提要無以字為上有自字
據凡例注文合從提要

○吳立故太子和

為南陽王

吳主權復封和為南陽王居長沙奮質實長沙郡名
注見獻帝

興平元年武昌郡名注見建興七年一統志云虎林
古邑名故城在池州府城東二十五里吳孫權封子

休為琅邪王鎮
虎林城卽此

夏四月吳主權卒太子亮立以諸葛恪為太傅

吳主權疾病潘后使人問孫弘以呂后稱制故事左
右畏后虐戾伺其昏睡縊殺之權病困召諸葛恪孫
弘太常滕胤及將軍呂據侍中孫峻屬以後事而卒
弘素與恪不平祕不發喪欲矯詔誅恪峻以告恪恪

請弘咨事於坐殺之乃發喪諡權曰大皇帝太子亮
 卽位以恪為太傅肩為衛將軍呂岱為大司馬恪乃
 命罷視聽息校官原逋責集覽罷視聽罷不御也視
 除關稅崇恩澤衆莫不悅集覽聽聲色之好也息校
 官息屏去也校官卽校人周禮校人掌王馬之政注
 校尸教反校之言校也主馬者必仍校視之故曰校
 人又漢書校獵註謂連接木以闌禽獸故謂養禽獸
 者曰校人原逋責原免逋欠也責與債通漢書注欠
 負官物亡匿不還者皆謂之逋除關稅除去關市之
 稅歛也孔子家語曰臧文仲置六關不仁也注魯本
 無此關文仲始置以稅行者故為不
 仁孟子曰昔者文王闢市譏而不征

書法

自漢室衰微羣雄竊據不修職貢綱目無取
 焉仲謀代立綱目書予之者三不遣任子一

也迎擊曹操二也改元拒魏三也而襲取江陵邀
 殺關羽遂使魏益以強漢不可復綱目獨深罪之

故昭烈之
師特書伐

吳徙其齊王奮於豫章

諸葛恪不欲諸王處濱江兵馬之地乃徙齊王奮於
豫章琅邪王休於丹陽奮不肯徙恪遺之牋曰帝王
之尊與天同位是以家天下臣父兄仇讐有善不得
不舉親戚有惡不得不誅所以承天理物先國後身
蓋聖人立制百代不易之道也大行皇帝覽古戒今
慮於千載是以寢疾之日分遣諸王詔策勤渠科禁
嚴峻誠欲上安宗廟下全諸王使百世相承無凶國
害家之悔也大王宜上惟太伯順父之志中念河間
東海恭順之節下存前世驕恣荒亂之戒而聞頃至
武昌以來多違詔敕不拘制度擅發諸將私殺左右
小大驚恠莫不寒心俚語曰明鑑所以照形古事所
以知今大王宜深以魯王為戒改易其行若棄忘先

帝法教懷輕慢之心臣下寧負大王不敢負先帝遺詔寧為大王所怨疾豈敢令詔敕不行於藩鎮邪奮懼遂

集覽

大行皇帝注見昭帝元平元年太伯順父之志周本紀古公亶父有長子曰太伯次

曰虞仲少曰季歷季歷生子名昌有聖瑞太伯知古公意欲立季歷以傳昌乃亡於荆蠻以讓季歷是為王季後遂傳昌是為文王河間東海恭順之節河間獻王德景帝子也東海恭王彊光武帝子也皆願備藩國以魯王為戒前

質實

穆章郡名注見武帝元鼎五年丹陽郡名注見明帝永平

年十三

冬十月吳諸葛恪修東興隄十二月魏人擊之恪與戰

于徐塘魏人敗走

初吳大帝築東興隄以遏巢湖後攻魏淮南敗以內
船遂廢不治至是諸葛恪更作大隄左右結山峽築
兩城各留千人使全端留畧守之魏諸葛誕言於司
馬師曰今因吳內侵使文舒逼江陵仲恭向武昌以
羈吳之上流然後簡精卒攻其兩城可大獲也是時
征南王昶征東胡遵鎮南毋丘儉各獻征吳之策詔
以問尚書傳嘏嘏曰吳為寇六十年君臣相保吉凶
同患設令列船津要則彼堅城據險橫行之計其殆
難捷今邊城之守與賊相遠羅落重密間諜不行而
舉大衆臨巨險以徼功先戰而後求勝非長策也唯
有進軍大佃最差完牢可詔昶遵等擇地居險三方
竝進奪其肥壤使還墻地一也兵出民表寇抄不犯
二也招懷近路降附日至三也羅落遠設間構不來
四也賊退其守佃作易立五也坐食積穀士不運輸
六也釁隙時間討襲速決七也凡此七者軍事之急
務也不進據則賊擅便資據之則利歸於國不可不

察也師不從詔昶等三道擊吳昶攻南郡儉向武昌
遵誕攻東興恪將兵四萬救東興遵等作浮橋以渡
陳於隄上分兵攻兩城城高峻不可拔恪使將軍丁
奉與呂據為前部從山西上奉曰諸軍行緩若賊據
便地則難與爭鋒我請趨之乃辟諸軍使下道自率
麾下三千人徑進舉帆二日至東關遂據徐塘時天
雪寒遵方置酒高會奉見其前部兵少使兵皆解鎧
去矛戟但兜鍪刀楯保身緣竭魏人望見大笑之不
即嚴兵吳兵得上便鼓譟斫破其前屯據等一至魏
軍驚擾散走爭渡橋壞相蹈藉溺死者數萬吳獲車
乘牛馬驢騾各以千數資器山積振旅而歸昶儉聞
東軍敗各燒屯走朝廷欲貶諸將師曰此我不聽公
休過也諸將何罪悉宥之惟削其弟昭爵而已後雍
州刺史陳泰求敕并州討胡禾集而鴈門新興以遠
役驚反師又曰此我過也非陳雍州之責是以人皆
愧悅習鑿齒曰司馬師引二敗以為已過過消而業

隆若推過歸咎執其功而隱其喪則上下離心賢愚
鮮體矣君人者苟統斯理以御國行失而名揚兵挫
而戰勝雖百敗可也況於再乎○魏光祿大夫張緝
曰恪其不免乎司馬師曰何也緝曰威震其主功蓋
一國何**集覽**巢湖在無為軍巢縣東南周圍四百里
以能久**集覽**與合肥舒城廬江巢縣四邑接境巢通
作灤或作劉晉灼並音勦絕之勦然今皆讀為鉏交
反全端留畧二人之姓名乃辟諸軍使下道為句辟
皮亦反猶言辟易也使諸軍開張而避於路下東關
無為郡志巢縣有東西二關吳魏相持於此濡湏山
謂之東關東關之北岸吳築城七寶山謂之西關西
關之南岸魏樹柵保身緣堦保與裸通祖裼也裼音
其謁反堤竭也謂脫衣露體緣循堦堤而進也我不
聽公休過也公休諸葛誕表字先嘗諫征吳司馬師
不聽令兵敗而引咎歸已隱其喪喪四浪反**質實**
謂喪師也隱蔽而不言也按喪字當作喪


志云東興隄在廬州府無為州東北五十里東關口
西接巢湖一名濡須塢乃吳諸葛恪所築以遏巢湖
左右依山峽築兩城使全端守之魏人圍東關圖壞
其隄不克巢湖注見建興十二年丁奉廬江人東關
注見建興六年廬門郡名注見秦王政三
年新興郡名注見晉孝武帝太元九年

御批資治通鑑綱目卷十五

謹案第一頁後四行初魏以夏侯淵子楸都督關
中按楸係惇子非淵子也此誤

第二十二頁後四行五代梁置匡國軍唐改忠武
軍按五代史職方考許州唐故曰忠武梁改匡
國唐滅梁復曰忠武此有脫誤





總校官庶吉士臣張能照
校對官檢討臣王鍾健
謄錄貢生臣李敬敏